

KWENDA, TUBA



... kupesa kimbangi, ya mpangi-kento yina ya fioti kuna na manima, mu banza ya me basisa dibanza ya nkunga yayi:

Oh, zola ya Nzambi, kele ya nene mingi!
Beto lenda kuteza yawu ve!

Yinki kilumbu ya kele samu na beto. Beto vwanda kaka swi, na bayintu ya beto ya kukulumusa ntangu yayi, beto yimbila Mfumu na ntwala beto sambila. Na yina, Teddy, kana nge me zola, pesa beto mwa note. Mpe beto yimbila yawu kaka na... na bayintu ya beto ya kukulumusa, meso ya beto ya kukanga, na ntwala beto sambila.

Oh, zola ya Nzambi, kele nene mingi!
Ba lenda kuteza yawu ve mpe yawu kele ngolo!
Ya ke vwanda mvula na mvula... [Kitini ya mpamba na bande—Mu.]

² Kana tinta, masa nionso me soba na tinta, mpe mazulu nionso me kuma kisika ya kusonika, mpe konso mwinga na zulu ya ntoto kuvwana dinzala, mpe muntu nionso kuvwanda nsoniki, kasi ya ke tendula ve zola ya Nzambi samu na dikanda ya Adam yina kubwaka. Beto ke tonda Nge, Tata, samu na Menga yina ya ntalu ya Mfumu Yesu, mpe samu na suka ya lubambuku ya mvumbukulu, mpe samu na zola ya Nge ya luvuukisu yina me tsyamuka na kati ya bantima ya beto bubu yayi, na nzila ya Mpeve-Santu. Yina ke na nata beto na kubundana na Yandi, Mosi yina kele ya Kinzambi, Kiyidiki. Yina me kotisa beto na kimpangi, na zulu ya ntoto, yina me lutaka ata fioti ve. Ata loge mosi ve, ata ndefi mosi ve, lendaka ata fioti ve, ata fioti ve kufwanana na kimpangi ya babakala mpe bakento yina me butuka mbala ya zole. Mpe ya ke vwanda nkunga ya kukonda nsuka ya basantu mpe bawanzio!

³ Beto ke sambila ti Nge ke sakumuna nionso yina beto ke sala samu na kumeka na kutuba, matondo ya beto—ya beto na kati ya bantima ya beto samu na Nge, samu na yina Nge me sala samu na beto. Mpe na kuzaba ti kaka ve bantima ya bilandi vwandaka na kiese na suka yina, Marie mpe Marie Madeleine, kasi beto mpe, bilandi ya Nge bubu yayi, bantima ya beto kele na kiese na ngunga yina beto me tala ti Yandi kele ya kufwa ve, kasi Yandi ke zinga. Bika ti Yandi zinga ntangu nionso na kati ya bantima ya beto, na kati-kati ya beto. Beto ke lomba yawu na Nkumbu ya Yesu. Amen.

Ya kele ata fioti ve na muntu mosi lendaka tendula mvumbukulu!

⁴ Ntangu yayi, na mvumbukulu ya suka yayi, ya ke ntangu mosi ya kitoko mingi samu ti mwa mambu ya fioti kusalama na

yinzo-Nzambi ntangu yayi, na yina, bamama ke na kubieka ba-bébé ya bawu. Ya ke kima mosi ya malu-malu, kima mosi me yikama na yinzo ya bawu. Lusakumunu mosi ya malu-malu me kwisa na bawu. Mpe bawu zola, ntangu yayi, kupesa yawu na Nzambi.

⁵ Na yina na manima ya nsangu ya suka yayi, beto ke sambila samu na bambevo, ti beno ke vumbuka na bimbevo ya beno, samu na kuzwa mavimpi ya malu-malu. Na yina mbala mosi na manima ya yina, samu na bayina me bakaka mbotika ve, beto ke vwanda na mvumbukulu ya yawu; kuzikama na masa, kuvumbuka na luzingu ya malu-malu. Ya ke mvumbukulu ya mvimba na suka yayi, mvumbukulu! Bantima ya beto me kuma na kiese mpe na nsemo, mutindu beto ke yimbila bankunga mpe beto ke kuwa bimbangi ya bantu yankaka, samu na mvumbukulu ya kitoko na suka yayi. Mpe beto ke tala na nganda mpe beto ke mona Nzambi ke sepela samu na yawu, bayinti ke na kuvumbuka.

⁶ Mwa ntangu fioti me luta, kuna na Kentucky, Tata Wood na munu vwandaka zomba bampadi, mpe beto kwendaka kuna na kisika ya muntu. Muntu yango lenda vwanda awa na ntangu yayi, na mutindu mu me zaba. Mpe yandi zolaka vwanda mumpani. Mpe Mpangi Wood yufulaka yandi, yandi tubaka, “Mu lenda zomba bampadi na kisika ya nge?”

Yandi tubaka, “Yinga, Wood, nge lenda zomba bampadi. Kwenda kuna na manima.”

Yandi tubaka, “Mbote, mu me nata, pasteur ya munu.”

⁷ Mpe yandi tubaka, “Wood, nge ke zola tuba na munu ve ti nge me kubwa na nsi mingi ti nge fwana tambula na mulongi ntangu nionso!”

⁸ Mpe na yawu yandi bokilaka munu kuna samu—samu na kutalisa munu. Mpe bakala yango ba tubaka ti yandi lendaka vwanda bakala mosi ya mambu ya ngolo. Bantu yankaka vwandaka tuba mutindu yina, na yina, kasi yandi vwandaka mona ve kima yina lendaka sala ti yandi kukwikila.

⁹ Mpe ya vwandaka na yinti ya pomme kuna wapi mu bukaka pomme na yawu. Ya vwandaka na Ngonda ya nana. Mpe mu tubaka na bakala yango, mu tubaka, “Yinti yango kele na bamvula yikwa?”

¹⁰ Mpe yandi tubaka, “Pene ya bamvula makumi tatu,” kima mosi to yankaka. Yandi kunaka yawu.

¹¹ Mpe mu tubaka, “Nge ke kudiaka ba-pomme kubanda ya ke butaka?”

“Yinga, tata.”

¹² Mu tubaka, “Yinki ke salamaka na yinti yango? Kana nge tala yawu, ya ke ntangu yayi Ngonda ya nana, mwini ke vwandaka ngolo ntangu nionso; kasi ntangu yayi matiti ke

kubwa na yinti yina, mpe masa ya yinti ke na kubika mavala, ya ke kulumuka na bansimbulu. Kana ya lendaka vwanda awa tii na hiver, yinti ke vwanda diaka ve; kasi ya ke kulumuka na ntoto, samu na kukibumba na madidi ya mipepe ya ngolo. Kana yawu vwanda awa, yawu ke kufwa, ya ke buta diaka ba-pomme ve. Kasi ya ke kulumuka samu na kubumbama na kati ya bansimbulu, samu na kukwisa vutuka na mvula ke kwisa, samu na kunatila mwa ba-pomme kisika mosi kuna, mpe mwa matiti.”

¹³ Mpe mu tubaka, “Ntangu yayi, tata, mu ke lomba—lomba na nge na kutuba na munu yinki Mayele ke sala mutindu yina na masa ya yinti na ntwala ya madidi, samu yawu kulumuka na kati ya bansimbulu samu na kubumbama? Kana nge lenda tuba na munu yinki ke sala yawu, mpe nge tendula yawu na munu, yinki ke sala yawu, na yina mu ke tuba na nge na kutelemisa diboko ya nge na Nzambi.” Mu tubaka, “Tula masa na kitini ya yinti yina mpe tala kana ya ke sala yawu, tala kana nsobolo ya nsungi ke sala yawu. Ya ke na Mayele ya nene ve yina ke sala ti masa ya yinti yina kutina na kati ya bansimbulu, na manima ya ke kwisa vutuka diaka na luzingu ya malu-malu. Ya kele Nzambi.”

¹⁴ Mpe yandi tubaka, “Mu ke kwendaka mingi na yinzo-Nzambi ata fioti ve.” Yandi tubaka, “Kasi ya vwandaka na mulongi mosi awa na Acton, na ntangu mosi, yina tubaka na kento mosi, yina vwandaka zinga kuna na zulu ya mongo, ti mpangi ya yandi ya kento vwandaka kuna na lukutakanu na nkokila yina, mpe yandi tubaka na yandi ti yandi vwandaka sambila samu mpangi ya kento yina vwandaka na cancer.” Mpe yandi tubaka, “Kento ya munu na munu vwandaka kuna samu na kusadisa yandi.” Mpe yandi tubaka, “Yandi vwandaka ya kubela mingi, na cancer ya estomac, ti ba vwandaka balula yandi na mbeto na bulanketi, mpe nionso yina. Mpangi ya yandi ya kento kwisaka na muswale kuna,” yandi tubaka, “na manima bakala yina tubaka na yandi bampasi ya yandi mpe nionso, yandi tubaka ‘tetika muswale na zulu ya yandi.’” Mpe yandi tubaka, “Yandi kele na mavimpi ya mbote bubu yayi.”

¹⁵ “Mpe ya ke talisa ti.” Mu tubaka, “Mayele yina mosi ke tubaka na masa ya yinti na kati ya yinti yina, mvula na mvula, kaka na ntwala ya nge, na kukulumuka na kati ya bansimbulu samu na kubumbama, ya kele Mayele yina mosi tubaka na munu ti kento yina ke beluka ntangu yandi ke tetika. . .” Mu tubaka, “Ya kele ve ya mansweki mingi—mingi. Nge ke na mulongi ya mbote mingi yina me telama na ntwala ya nge, yinti, yina ke tubaka na nge mvula na mvula.”

¹⁶ Kana beto tala na lweka, beto ke mona Nzambi bisika nionso. Yandi kele na konso yinti, na konso kitini ya nianga. Ya ke na kima mosi ve lenda sala yawu ya ke kaka Nzambi. Beto lenda sala kima mosi ke fwanana na yawu; kasi luzingu yina ve, ya kele Nzambi.

17 Ntangu yayi, ba me yika mwa kitini ya nianga na mwa bayinzo awa, mpe beto zola bieka mwa ba-bébé yayi na Mfumu. Teddy, beto ke na mwa nkunga mosi beto ke yimbaka awa, *Beno Nata Bawu Na Kati*, nge lenda bula yawu na ntangu bamama yina zola bieka ba-bébé ya bawu, mpe batata, ba ke nata ba-bébé ya bawu awa na autel.

18 Mpe beto ke na mwa bafololo mingi ya Paki awa na autel na suka yayi, mutindu yina ve? Oh, la la, la la! Mu ke banza ya ke na mwa ba-Marie, ba-Ruth, ba-Rebecca, Jacques ya fioti, Paul, mpe Jean, bisika nionso awa, mwa bafololo ya Paki samu na nsungi yankaka.

19 Ya ke mbote mingi, kuna. Mu ke kwikila ti Mpangi Beeler zola baka foto ya mwa bébé yayi—yayi me telama awa, ya ke—ya ke nkooko ya Mpangi Wood, Mpangi-kento Wood kele awa. Mpe bayankaka ke na kukwisa ntangu yayi na ba-bébé ya bawu. Beno luta na ntwala, bibuti. Ya ke mbote mingi. Mpangi Neville.

20 Kimvuka ya santu ya makwela kele nene, ya me tumama na Nzambi. Mpe na nzila ya kimvuka ya santu me basika mwa ba-bébé yayi ya luzolo.

21 Beno tuba na munu nkumbu ya yandi ntangu yayi awa. Brenda Sue. Nge ke monana ya luswaswanu mingi, bébé, kulutila ntangu mu monaka nge ntete. Mbote, yayi kele bébé Brenda Sue Wood, ya kieleka ya ke mwana ya kitoko na bantima ya beto nionso, mingi-mingi samu na mama yayi ya ntwenia mpe tata yayi.

22 Mpe na ntangu ya Biblia. Bantu mingi ke tiamunaka masa na ba-bébé yayi ya fioti; kasi beto ke meka na kulanda lutwadusu ya Biblia pene-pene. Beto me monaka ata fioti ve kisika ba me tiamunaka masa na zulu ya bawu, na kati ya Biblia, kasi ba nataka bawu na Mfumu Yesu mpe Yandi sakumunaka bawu. Mpe beto ke baka bawu, mutindu misadi ya Yandi, mpe beto ke zangula bawu na Yandi.

23 Mu ke kwikila ti beno zaba kilengi yina nkooko ya bakala ke na yawu, beno zaba. Na yawu beto kulumusa bayintu ya beto na mwa ntangu fioti.

24 Mfumu Yesu, Mwana ya Nzambi, Yina pesamaka samu na masumu ya beto. Mpe ya ke kima ya kitoko mingi na kumona bana ya fioti ba me nata na Nge, samu na kubambuka moyo na yina salamaka na bamvula me luta, ntangu bamama na batata nataka bana ya bawu na Nge. Beto me zangula bawu na ntwala ya Nge, bubu yayi, na maboko ya lukwikilu, bébé Brenda Sue Wood, yina Nge me fidisa na dibuta ya Mpangi ya beto David na kento ya yandi ya ntalu. Tata Nzambi, sakumuna mwana yayi.

25 Ba me tula lukwikilu ya bawu na Nge, mutindu ba ke talisa mbuma ya kimvuka ya bawu. Mpe beto ke sambila ti Nge ke sakumuna bawu. Mpe bika bantima ya bawu kupela na Mpeve-Santu, samu na kuzinga luzingu ya busantu, baluzingu

ya kukipesa, ti ba ke kulisa bébé yayi na yinzo ya Baklisto, ba ke sansa yandi landila bandongosolo ya Nzambi, mpe ya ke zinga luzingu ya yinda, ya kiese awa na zulu ya ntoto, mpe yandi ke sadila Nge bilumbu nionso ya luzingu ya yandi. Mpe kuna na Nkembo, kisika mabuta ke vukana, bika ti bébé Brenda Sue na papa mpe mama ya yandi, mpe bantu ya bawu nionso, kuvukana pene-pene ya kiti ya kimfumu ya Nzambi, yina ba me vuukisa na lemvo ya Klisto, na yina beto me zangula yandi na Yandi ntangu yayi.

²⁶ Mpangi ya munu ya kento ya fioti, mu ke pesa nge ntangu yayi na Mfumu Yeu Klisto, samu na luzingu ya kusadila Yandi, na Nkumbu ya Yesu Klisto, Mwana ya Nzambi. Amen.

²⁷ Nzambi sakumuna nge, Marilyn, David, na kiese mingi mpe lunungu. Bika ti bébé yayi kuzinga samu na Kimfumu ya Nzambi.

²⁸ Ntangu yayi, yayi kele mwana-bakala mosi ya mbote, na maseka ya nene na kizizi ya yandi. Nkumbu ya yandi? [Mama me pesa mvutu. Kitini ya mpamba na bande—Mu.]

Sharon Rose. . . [Mama me tuba, “Sharon Daulton.”—Mu.] Daulton. Daulton. Yayi kele bébé ya Mpangi Ed? Mbote, na yina, pene ya bamvula makumi zole na zole me luta, Nzambi bakaka na maboko ya munu Sharon Rose ya fioti, yina kele na Zulu, bubu yayi. Mpe ntangu yayi, mu ke bieka na Yandi, Sharon Rose Daulton ya fioti. Beto zaba Mpangi Ed na Mpangi-kento Daulton, awa, mutindu bankundi ya beto ya ntalu. Yinki bébé yayi ya kitoko!

Tata ya beto ya Mazulu, beto me nata na Nge Sharon Rose yayi ya fioti. Samu na kubambuka moyo na Mfumu ya nene Yesu, Yina vwandaka na zulu ya ntoto, mpe ba natilaka Yandi bana-bakento ya fioti mutindu yayi, mu ke sambila samu na bébé yayi, Mfumu. Bika ti yandi kuzinga mpe yandi kuvwanda na ngolo mpe na mavimpi ya mbote. Bika yandi kuzinga samu na nkembo ya Nzambi. Sakumuna tata ya yandi mpe mama ya yandi. Bika ti ba sansa yandi landila bandongosolo ya Nzambi. Ba ke tula lukwikilu ya bawu na Nge mutindu ba ke talisa bébé ya bawu na Nge. Ntangu yayi beto ke pesa na Nge, bébé Sharon Rose Daulton, ti Nge ke sakumuna luzingu ya yandi, Mfumu. Mu ke talisa yandi katuka na maboko ya mama mpe tata ya yandi, na Nge, Mfumu ya Munu mpe Mvulusi, Yesu Klisto, samu na nkembo ya Yandi. Amen.

Nzambi sakumuna nge, mpangi-kento, mpe nge, mpangi-bakala.

Oh, la la! Mwana-bakala ya fioti, ya kubela. Yinki kele mpasi ya yandi? [Mama me tuba, “Yintu ya yandi ke na kukuma nene.” Kitini ya mpamba na bande.] . . . kima mosi ya luswaswanu. Mu ke kwikila na Yandi.

Mfumu, Nzambi, mu me zangula na Nge bébé Mason. Mu ke sambila, Mfumu Yesu, ti Nge ke baka bébé yayi mu me zangula awa na maboko ya munu, samu na kubieka yandi na Nge. Mu ke singa kimbevo yayi na zulu ya yandi. Na Nkumbu ya Yesu Klisto, bika ti bébé Mason kukota na maboko ya Nge, Mfumu, mpe bika ti kimbevo kukatuka na zulu ya yandi. Bika ti bébé yayi kuzinga samu na lukumu mpe nkembo ya Nzambi. Bibuti ke na kutula lukwikilu ya bawu mutindu ba ke nata yandi. Bika ti Nge belusa mwana mpe yandi vwanda na mavimpi ya mbote. Bika yandi zinga samu na nkembo ya Nzambi, samu na kusadila Nge. Mfumu Nzambi, mu ke pesa Nge bébé Mason, na Nkumbu ya Yesu Klisto, samu na luzingu ya yandi mpe samu na kubeluka ya nzutu. Amen.

[Kisika ya mpamba na bande—Mu.] Beno kwikila kaka na ntima ya beno ya muvimba.

Oh, mwana-kento, diaka? Mbote, ya ke mbote. Kwisa awa, nkundi ya luzolo. Telema awa. Nkumbu ya nge kele . . . ? [Tata ya yandi me tuba, “Sumner.”—Mu.] Sumner. Mpangi-bakala mpe Mpangi-kento Sumner. Mu ke kwikila ti nge me katuka na Georgie, mutindu yina ve? Mu banza ti mu me bambuka moyo na kisambu. Ya ke na bantu mingi kuna. Ya ke . . . [“Latrelle.”] Latrelle. [“Dwight.”] Dwight. [“David.”] Mpe David. Beno me kuwa nkumbu ya bawu. Bika ti Nzambi kusonika bankumbu ya bawu na Buku ya Luzingu ya Mwana-dimeme.

Tata ya beto ya Mazulu, beto ke nata na Nge bana yayi ya luzolo na suka yayi, mutindu mu ke tetika diboko ya munu na zulu ya mwa mikoto na yintu ya bawu, mwa bansuki ya pete ya bana-babakala yayi. O Mfumu, sakumuna bawu. Bibuti ya bawu me tula zola ya bawu mpe lukwikilu ya bawu na Nge na kupesaka bana ya bawu. Mpe beto ke bieka bawu na Nge, Mfumu, mutindu ba me baka bawu na maboko ya bibuti ya bawu, na mutindu ba me telema awa na autel yayi na suka yayi, samu na kupesa baluzingu na Nzambi. Sakumuna bawu, Tata. Beto ke sambila ti Nge ke bika bawu zinga samu na kuvwanda na kiese, bilumbu nionso ya luzingu ya bawu, Luzingu ya Kukonda nsuka na yinza yina ke kwisa. Bika ti ba sansa bawu landila bandongosolo ya Nzambi, na yinzo ya Baklisto.

Ntangu yayi, na nzila ya lutumu ya Yesu Klisto, yina pesaka mbandu na balongi ya Yandi, ti bawu lendaka landa mutindu Yandi salaka, mu ke pesa bawu na Nge, na Nkumbu ya Yesu Klisto. Amen.

[Kisika ya mpamba na bande—Mu.]

Kuna na nsi na kizunga ya mwini ya ngolo na Georgie, ba me nata bébé yayi awa na nzila ya tata mpe mama ya yandi ya luzolo, samu na kubieka bawu na Nge na suka yayi ya lubambuku. Ya kele mutaku ya lemvo ya Nge na dibuta ya bawu. Mu ke sambila Nge na kusakumuna bébé Renee, mama ya yandi mpe tata ya

yandi. Mpe ba ke tula lukwikilu ya bawu na Nge, na kunataka mwana, bawu zola masakumunu ya Nge na zulu ya yandi. Mpe bika ti yandi zinga samu na kuvwanda Muklisto ya ngolo, ya kiese, bilumbu nionso ya luzingu ya yandi; mpe ti yandi kuzwa Luzingu ya Kukonda nsuka na bilumbu yina ke kwisa, na yinza yina ke kwisa. Pesa yawu, Tata. Mutindu nge zangulaka bana ya mutindu yayi, mutindu bana yayi na suka yayi, na maboko ya Nge, mabuta me tula lukwikilu ya bawu na Nge, na kunataka bawu na misadi ya Nge. Mpe beto ke sakumuna bébé mpe beto ke pesa yandi na Nge; katuka maboko ya bibuti ya yandi, na Nge. Na Nkumbu ya Yesu Klisto, bika ti Nge sakumuna yandi. Amen.

Sakumuna, mpangi-bakala. Nzambi kusakumuna nge, Renee.

Beto yimba nzila ya fioti ya yawu.

Beno nata bawu na kati, beno nata bawu na
kati,
Beno nata bawu na kati na ngaanda ya bilanga
ya disumu;
Beno nata bawu na kati, beno nata bawu na
kati,
Beno nata bana ya fyoti na Yesu.

²⁹ Oh, wapi mutindu mu zolaka telama na ndonga mpe kutuba samu na mosi ya bana yayi ya fioti, kasi mu ke malembe mingi, na mutindu nionso, mpe bantu kele ya kutelama. Mpangi Wood me tuba na munu na suka yayi, yandi me tuba ti mukongo ya yandi vwandaka sala mpasi, samu ya vwandaka ya kutelama. Beno zaba ve wapi mutindu mu ke sepelaka na beno na mutindu beno ke telamaka mpe beno ke vingila! Mpe mu ke sala kaka nswalu na nsangu, na mutindu nionso. Mpe beno kuwa na bukebi nionso.

³⁰ Mu vwandaka na ntangu ve ya kukubika lukutakanu ya suka yayi, to nsangu ya suka yayi, na mwa ntangu fioti. Mu bakaka dilongi mosi mpe kima yina vwandaka ya luswaswanu.

³¹ Mpe na Paki yina me luta mu longaka na zulu ya dilongi yayi: “*Na Luzingu*, Yandi zolaka munu. *Na Lufwa*, Yandi vulusaka munu. *Na Kiziku*, Yandi nataka ntama masumu ya munu. *Na Mvumbukulu*, Yandi nungisaka munu ya mpamba kimakulu. Kilumbu mosi Yandi ke *Kwisa*, oh, kilumbu ya nkembo!”

Na yina na suka yayi beto me longaka na zulu ya dilongi yayi: *Mu Zaba*.

³² Mpe ntangu yayi, kana Mfumu me zola, mu zola kutanga na kapu ya Santu Marc. Mpe beno sambila na munu ntangu yayi.

³³ Mpe na mbala mosi na manima ya yayi ke vwanda kisalu ya kubeluka ya nzutu. Mpe na yina na manima ya kisalu ya kubeluka ya nzutu ke vwanda kisalu ya mbotika. Mpe na

manima ya balukutakanu ke vwanda na nkokila yayi na ngunga ya sambwadi na ndambu.

³⁴ Ntangu yayi Marc 16.

Mpe ntangu saba lutaka, Marie ya mbanza Magdala, . . . Marie mama ya Yesu, mpe Salomé, nataka mananasi, bawu kwendaka samu na kutula yawu na nzutu ya yandi.

. . . na suka-suka ya kilumbu ya ntete ya sabala, bawu kwendaka na ntoni.

Mpe bawu tubaka bawu na bawu, Nani ke vundumuna beto ditadi yina keke na kielo ya ntoni?

Mpe ntangu bawu talaka, bawu monaka ti ditadi yango vwandaka me vundumuka na lweka: samu ya vwandaka nene mingi.

Mpe bawu kotaka na ntoni, bawu monaka ditoko mosi ya bakala yandi vwandaka ya kuwanda na lweka ya bakala, yandi vwandaka me lwata bilele ya mpembe; mpe bawu kumaka na boma.

Mpe bawu tubaka bawu. . . Mpe yandi tubaka na bawu, Beno vwanda na boma ve: Beno ke sosa Yesu ya Nazareth, yina ba komaka na kulunsi: yandi me vumbuka na lufwa; yandi keke awa ve: beno tala sika yina ba tulaka yandi.

Kasi beno kwenda, mpe beno tuba yayi na bilandi ya yandi mpe na Pierre ti yandi ke na kuvingila beno na Galilée: kuna beno ke mona yandi, mutindu yandi tubaka na beno.

Mpe bawu basikaka na ntoni, mpe kimaka ntama; samu ti bawu vwandaka tekita na boma: na yina bawu tubaka ata diambu ve na muntu; samu na boma.

Ntangu yayi ntangu Yesu vumbukaka na suka-suka ya kilumbu ya ntete ya sabala, yandi monanaka ntete na Marie ya Magdala, yina yandi basisaka bampeve ya yimbi sambwadi.

Mpe yandi kwendaka mpe tubaka na bawu ti yandi me vwanda na yandi, mutindu yandi. . . mutindu bawu vwandaka na kiadi mpe bawu vwandaka kudila.

³⁵ Beno me mona, bawu vwandaka na zulu ya kinkunku ya mbombi, diaka.

Mpe bawu, ntangu bawu kuwaka ti yandi keke zinga, mpe yandi me monana na kento yina, bawu kwikilaka ve.

³⁶ Wapi mutindu Bandinga ya Nzambi keke ya mansweki!

Na manima yandi monanaka na...na mutindu yankaka na bilandi ya yandi zole, yina vwandaka na nzila, mpe ba vwandaka kwenda na bwala.

Mpe ntangu...mpe bawu vutukaka mpe zabisaka yawu na bilandi yankaka: kasi bawu mpe kwikilaka yawu ve.

Na manima yandi monanaka na bilandi ya yandi kumi na mosi ntangu bawu vwandaka kudia, mpe yandi sembaka bawu vwa-...bawu vwandaka ve na—na lukwikilu mpe samu bawu vwandaka na ntima ya ngolo, mpe samu bawu kwikilaka ve bantu yina monaka yandi na manima ya kuvumbuka na lufwa.

Mpe Yandi tubaka na bawu, Beno kwenda na yinza ya mvimba, . . .beno longa Nsangu ya mbote na bantu nionso.

Yandi yina ke kwikila mpe ke baka mbotika yandi ke kuzwa mpulusu;. . .yandi yina ke kwikila ve ke kuzwa kitumbu.

Bidimbu yayi ke landa bayina ke kwikila; na nkumbu ya munu ba ke basisa bampeve ya yimbi; ba ke tuba bandinga ya malu-malu;

Ba ke simba banioka;. . .kana bawu kunwa manganga ya yimbi, ya ke sala bawu yimbi ve; bawu ke tetika maboko na zulu ya bambevo, . . .bawu ke beluka.

Na manima Mfumu zabisaka bawu mutindu yina, yandi nangukaka na zulu, mpe yandi kwendaka vwananda na lweka ya bakala ya Nzambi.

Mpe bilandi kwendaka zabisa Nsangu ya mbote, na bisika nionso, Mfumu vwandaka sala kintwadi na bawu, mpe vwandaka siamisa ndinga na bidimbu yina vwandaka landa bawu. Amen.

37 Mu ke zola baka dilongi na bampova zole: *Kwenda, Tuba.*

38 Beno zaba, ya ke sala mbote mingi ve na kukwenda kana beno kele ve na kima ya kutuba. Mu banza yawu yina ya ke na mavwanga mingi bubu yayi. Beto ke kwenda kutuba, beto ke kwenda kasi beto ke na kima mosi ve ya kutuba, kima mosi ve ya ndandu, kima mosi ve yina lendaka sadisa bantu.

39 Kasi kana beto ke landa bandongosolo mutindu bilandi yayi yina kuzwaka lutumu, beto ke na lutumu ya mutindu mosi, “Kwenda, tuba na bilandi ya Munu ti Mu me vumbuka na lufwa.” Kwenda, tuba yawu!

40 Na yina Yandi me tuba, “Kwenda, longa yawu, mpe talisa bidimbu yayi ti Mu me vumbuka na lufwa.” Yinki nsangu! “Kwenda, tuba, mpe kwenda, talisa na bilandi ya Munu bima

yayi nge me mona, ti Mu kele ya kufwa ve, kasi Mu me vumbuka na lufwa.”

41 Na Nsangu ya suka na suka yayi, beto me mona ti mosi na mosi ya beto kele na mwa kinkunku ya mbombi ya mavwanga mpe bakumekama ti beto ke vwanda kuna na zulu, na ntangu yankaka, beto ke vingila lusalusu. Beto me mona ti patriarche ya nene Job kuzwaka vision, samu ba vwandaka ntete na Paki ve, kasi yandi monaka bamvula mafunda yiya ntama na suka yayi. Yandi monaka bamvula mafunda yiya ntama kuna, na Paki, mpe yandi bokaka, na kati ya kiadi, “Mu zaba ti Kivuukisi ya munu kele moyo! Na bilumbu ya nsuka, Yandi ke telama na zulu ya ntoto. Ata na manima misobi me bebisa nzutu yayi, kasi na kati ya nzutu ya munu mu ke mona Nzambi.”

42 Ntangu yayi, na manima ya Paki, beto me mona ti Nzambi pesaka muntu lutumu, “Kwenda, tuba! Mpe kana nge tuba, *yayi* ke landa nge. Kwenda mpe tuba!”

43 Ntangu yayi, ya ke sala mbote ve, mutindu mu me tuba, na kukwenda, na kukwenda, kana beno ke na kima ya kutuba ve. Mpe kana beno ke na nsangu ya luvunu na zabisa, na yina ya ke sala kima mosi ya mbote ve. Beno fwana kutuba yina kele kinsweki.

44 Na mwa ntangu fioti me luta mu vwandaka tanga buku mosi, ya mwana-bakala mosi yina vwandaka...kotaka na competition. Mpe na competition yayi yandi zolaka kubaka nkumbu mosi ya lukumu. Konso muntu yina lenda bumba mpova ya kinsweki na yintu ya yandi tii kuna ya ke kuma kisika mosi kuna, mpe yandi zolaka tuba mpova yayi ya kinsweki, mpe fungula ya mwelo lendaka zibuka samu yandi kukota. Yina vwandaka samu na kutesa Quotient Intellectuel ya mwana. Mpe ntangu yandi ke kuma na kisika yango, yandi ke tuba mpova ya kinsweki yina ba pesaka yandi, mwelo zolaka zibuka mpe yandi zolaka baka lukumu ya nene.

45 Mwana-bakala mosi ya fioti, yina vwandaka tambula nswalu, mpe yandi zabaka mbote mpe mbote-mbote ti yandi lendaka kwenda mbangu kulutila bana-babakala nionso na competition, to yandi banzaka mutindu yina. Yandi vwandaka sala ngalasisa ya mbangu, kilumbu na manima ya kilumbu. wapi mutindu yandi pompaka mwa ba-poumon ya yandi, yandi yidikaka nzutu ya yandi mbote-mbote, na mutindu ti yandi lendaka lembe ve ntangu yandi zolaka kwenda mbangu. Mpe yandi salaka bangalasisa wapi mutindu kubanda na makulu ya yandi, samu yandi kuluta bana-babakala nionso. Mpe wapi mutindu yandi fwana kupema na ntangu yandi ke kima mbangu, samu na kubumba oxygene yina ke kwisa na nzutu ya yandi, samu yandi landila na kupompa na ntswala, ti ya lendaka lembisa mingi ve yintu ya yandi. Yandi longukaka yawu na mutindu nionso yandi lendaka.

⁴⁶ Mpe na suka yina competition bandaka, ya vwandaka na ndonga na bana-bakala nkama mosi na makumi tanu, na mwa bamvula mosi. Kasi mwana-bakala yayi vwandaka mwana-bakala ya ntela ya mbote, samu na bamvula ya yandi. Mpe yandi bambukaka moyo na bangalasisa ya yandi nionso. Mpe vwandaka ya kukubama. Bawu kotaka na ndonga, bawu tulaka bizizi ya bawu na muniololo yina vwandaka luta kuna, bawu pusaka mwa bambombo ya bawu pene-pene ya yawu. Yandi longukaka misiku nionso me tala yawu, yandi kubamaka.

⁴⁷ Na manima ntangu munduki bulaka, mpe nsinga kuzenganaka, bana ya babakala lemukaka na ntwala. Mpe mwana-bakala yayi na mavimpi ya mbote ti yandi lemukaka mbangu na ntwala ya bawu nionso. Mpe kuna na piste yandi kwendaka na mbangu ya ngolo, yina me longusama mbote, ti yandi lendaka kima mbangu kulutila bana-babakala nionso yina vwandaka na competition. Mpe yandi vwandaka kuna, oh, swi ntangu ya yinda, ntangu yankaka muniti mosi to kulutila, na ntwala muntu yina lutaka bayankaka na mbangu kukuma na kisika yango.

⁴⁸ Kasi, na bangalasisa ya nzutu ya yandi, yandi zimbanaka mpova ya kinsweki. Yandi zimbanaka kima ya ngundi yina yandi zolaka tuba, samu yandi kuluta na mwelo. Mpe yandi kwendaka na manima mpe na ntwala, yandi banzaka yawu, mpe yandi sosaka na yintu ya yandi. Yandi vwandaka na nzutu ya kitoko, na mavimpi ya mbote, kasi yandi zimbanaka kima ya kulutila mfunu. Na yina, kuna na ndilu, bana-babakala yankaka yina kimaka mbangu mingi ve, bambukaka mpova ya kinsweki, mpe bawu kotaka.

⁴⁹ Ya ke mutindu yina bubu yayi! Beto ke sepela mingi na bivinga ya nene, mpe bayinzo-Nzambi mpe bivinga, mpe nionso yina, mpe beto ke sepela mingi na kukeba bayinzo-Nzambi ya beto na mukubu ya mbote, na bivinga ya kitoko mpe biti ya bilele ya kitoko mpe ba-orgue ya kitoko. Balongi ya beto me longukaka mbote na . . . Ba ke ba Docteur na Lettre, Docteur na Philosophie, Docteur na Droit, kasi beto me zimbanaka kima yina beto ke kwendila mbangu. Yawu yina kele dyambu. “Kwenda, tuba na bilandi ya Munu ti Mu me vumbuka na lufwa mpe Mu ke kutana na bawu na Galilée.” Beto me zimbanaka mpova ya kulutila mvutu. Beto me kuma na bizitu ya bima yankaka, na kusalaka bayinzo-Nzambi ya nene, na kutungaka ba-denomination ya nene, kasi beto me zimbanaka mpova ya kulutila mfunu.

⁵⁰ Baluzingu mingi me vulukaka samu ba yidikaka na ntwala mambu yina ke kwisa na ntwala. Na mwa ntangu fioti me luta, ba tubaka na munu ti kuna na Floride, zululaliste mosi, bureau ya météo, zabisaka na zulunale mosi ti ya ke vwanda na kitembo ya nene ke kwisa. Mpe muntu mosi vwandaka sansa bandeke, mpe yandi kwendaka na nkalani ya yandi mpe yandi tubaka na yandi ti kitembo ya nene ke kwisa. Yandi talaka yawu

mpamba, mpe yandi tubaka, “Ya ke na mfunu ve!” Mpe yandi landilaka kaka na kukwenda na ntwala. Yandi tulaka ata fioti ve bansunsu ya yandi na kisika ya mbote. Yandi kotaka ata fioti ve na bwatu. Yandi kubamaka ata fioti ve. Mpe nkalani ya yandi kukubamaka mbote-mbote. Kasi bima nionso, ya yina monaka mpamba bukebi, bansunsu ya yandi nionso kwendaka na mupepe mpe bawu kufwaka, yinzo ya yandi kubebaka, yandi zimbisaka nionso yina yandi bumbaka, ba nataka yandi na lupitalu. Nionso yayi samu yandi salaka keba ve! Yandi zabaka ti nsangu me pesama, kasi yandi zimbanaka na kusala keba na nsangu.

⁵¹ Ya ke mutindu yina ya ke salama bubu yayi, na mingi ya bantu ya beto, na mingi ya mabuundu ya beto. Beto zaba ti Biblia me longa ti Yesu Klisto kele mutindu mosi mazono, bubu yayi, mpe kukonda nsuka. Beto zaba ti Biblia me longa, Yesu tubaka, na Santu Jean 14:12, “Yandi yina ke kwikila na Munu, na yina, bisalu yayi Mu ke sala yandi mpe ke sala yawu; bisalu ya kulutila yandi ke sala, samu Mu ke kwenda na Tata.” Ntangu yayi beto ke sepela na bima yankaka, beto ke kubama ve, beto ke sala keba ve. Beto me kima mbangu, kasi beto me sala keba na Nsangu ve. Beto me kwenda, kasi beto me zaba ve yina beto ke tuba ntangu beto ke kuma kuna.

⁵² Mwa bilumbu fioti me luta ntangu mabuundu ya yinza yayi, ntangu mabuundu ya Baklisto talaka kiadi mpe nsoni, ntangu kisadi yayi ya luzitu mpe ya lukumu yina ke titaka Nzambi, Billy Graham, kumaka mbunzu na mbunzu na Biblia. Yandi kimaka mbangu, kasi yandi zimbanaka Nsangu; ntangu Musulman yina telamaka kuna na ntwala ya yandi mpe tubaka na yandi, “Kana yayi kele Ndinga ya Nzambi, sala ti Yawu monisamaka.” Yandi kimaka mbangu mbote, na ba-revil ya nene, na bima ya nene. Kasi, ntangu ya kumaka kisika yina, yandi vwandaka na Nsangu ve.

⁵³ “Mu me vumbuka na lufwa. Mu kele mutindu mosi mazono, bubu yayi, mpe kukonda nsuka.” Ba ke kima mbangu na nzutu, bayinzo-Nzambi ya kitoko, bamambele mingi, ba-denomination ya nene, kasi ya kele ve dibanza ya kulutila mfunu. Beno tala yina me landa, “Mpe bidimbu yayi ke landa bayina ke kwikila.” Beno kwenda, kasi bawu zabaka ve ya kutuka.

⁵⁴ Nzambi ke tindaka muntu ata fioti ve kana Yandi me pesa yandi ve kima ya kutuba. Nzambi ke siamisaka ntangu nionso Bandinga ya Yandi.

⁵⁵ Beno ke kwenda, kasi beno ke vwanda na kiyeka ya kutuba ntangu beno ke kuma kuna. Ata yinki mutindu ba-reveil ya beno kele nene, wapi mutindu dibuundu ya beno kele nene, to wapi mutindu denomination ke na lukumu kulutila bayankaka, kana beno ke na kima ya kutuba na bawu ve, yinki beno ke na yawu kasi kaka nkonga ya bantu me vukana kintwadi mutindu loge?

56 Beto ke na Nsangu ya kutuba na yinza, “Yesu kele na moyo! Yandi kele ya kufw ve!” Na kusalaka keba na Nsangu!

57 Na yinsi yayi ya nene yina beto ke na yawu ntangu yayi beto ke vutula matondo samu na yawu, Etats-Unis ya Amerique, na kubwa ya yawu nionso, na mambu ya yawu nionso ya mpamba-mpamba, na bayimbi ya yawu nionso, kasi ya kele yinsi ya kulutula nene na yinza, mpe na mbandukulu, samu ya vwandaka ya kusungama. Ya bumbaka Nsangu ve.

58 Bamvula mingi me luta, ntangu ya vwandaka na mbandukulu ya yawu, disolo mosi me kwisa na mabanza ya munu, ti ba-Britanique zolaka baka commonwealth ya yinsi yayi. Mpe ya vwandaka na nkonga mosi ya bantu yina vukanaka kintwadi mpe ba vwandaka na kisalu, ba vwandaka tala. Mpe ya vwandaka na mpunda mosi kuna ya kukanga, mpe munati mpunda belamaka na kumata na konso muniti yina. Kima ya ntete yandi kuzwaka vwandaka kidimbu mosi ti ba-Britanique ke kwisa, mpe yandi vwandaka tambula na mpunda. Yinki mbote ya ke sala yandi na kutwadisa mpunda ya yandi? Yinki mbote ya ke sala yandi na kubula mpunda samu na kumeka na kukwenda katuka na dibuundu yina tii na Boston, yinki mbote ya zolaka sala yandi kana yandi vwandaka na nsangu ve ya kutuba na bantu? Wapi mutindu ba zolaka zaba samu ti bawu kukubama?

59 Paul Revere ya beto ya bilumbu yayi me kima mbangu mbote, kasi, ba ke na kima kaka mbangu, ya ke na Nsangu mosi ve. Ngunga yawu yayi, ntangu ya mpasi ke na ntwala! Yinza me kuma na nsuka! Mabuundu me kutana na diambu ya bawu ya kulutula mpasi. Bayinsi me kutana na diambu ya bawu ya kulutula mpasi. Luzingu ya bantu me kutana na ntangu ya yawu ya kulutula mpasi. Bantu ya mayele me kutana na ntangu ya bawu ya kulutula mpasi. Beto me sala organisation mpe beto me sala bayinzo-Nzambi ya nene, beto me yidika milongi ya beto mbote-mbote mpe na nzutu beto me vukisa bawu kintwadi, ti bawu zaba wapi mutindu kusadila bisongi diambu ya bawu mpe ba-adverbe ya bawu, mpe miningu ya bawu mpe—mpe ba-voyelle ya bawu nionso, mpe bima nionso kaka na kati ya psychologie, samu na kusolula na bantu. Kasi yawu yina ve Yesu tubaka!

60 “Na Nkumbu ya Munu ba ke basisa bampeve ya yimbi. Ba ke tuba bandinga ya malu-malu. Kana nioka yina ke kufwaka bantu kutatika bawu, ya ke sala bawu yimbi ve. Kana bawu tetika maboko ya bawu na zulu ya bambevo, ba ke beluka.” Yinza ke na nsatu ya munati nsangu na Nsangu mosi, samu na kutuba kima mosi, mpe kuzaba kisika Nsangu me katuka mpe na Nani Yawu me katuka.

61 Paul Revere, na yina yandi mataka na zulu ya mpunda ya yandi, bakala ya kikesa, bakala yina ke vwandaka na kati

ya masolo ntangu nionso ya ke vwanda na masolo ya yinsi. Yandi tambulaka na lukumu nionso na bimatinu ya yinzo-Nzambi, na nsangu yina tekitisaka bantu nionso, kubanda na bamputu ti na bamvwama, kubanda na fermier tii na muntu ya mumbungu, “Ba-Britanique ke na kukwisa!” Mpe ba-milicien américain kukubamaka samu na kunwana. Mpe yinsi yayi ya nene vulukaka.

⁶² Kana difwa yayi ya Nzambi, kana bantu yayi ti Nzambi kufwaka, kana Dibuundu yayi ba me bokila na Nkumbu ya Yandi, fwana vuluka, beto fwana vwanda na munati nsangu na Nsangu yina me katuka na Kiti ya kimfumu, samu na kundima kukatula ndembe ya kilumbu yayi. Ya ke na Goliath, kasi ya kieleka Nzambi ke vwanda na David mosi kisika mosi kuna. Beto fwana kukutana mbunzu na mbunzu. Beto fwana vwanda... Beto fwana vwanda na Nsangu.

⁶³ Beto ke kwenda, kasi beto ke na kima ya kutuba ve. Ya ke siamisa yawu, ntangu beto ke kuma na kisika yina yinsi mosi to nkonga mosi ya bantu ke manga ti Yesu Klisto kele Mwana ya Nzambi ve, mpe ya me telama na ntwala ya balongi ya beto ya kulutula ntembe ya bubu yayi. Na yina na kati ya kimvuka ya nene ya dibuundu, beto ke mona makumi tatu ya ba-papier d’emballage ya ba-Communistes ya bamvula makumi zole to makumi tatu, ti ba ke bamambele ya parti ya ba-Communiste, na kati ya mabuundu ya beto me vukana. Yinki beto lenda sala? Ya ke talisa ti ba me kima ntinu kukondwa Nsangu; na kutekisaka bamuswa ya bawu ya bukuluntu ya yinsi, na kutekisaka bamuswa ya ntangu nionso ya Dibuundu.

⁶⁴ Yawu nionso me kuma na kisika ya kumeka ngolo. Ya me kuma na kisika yina Dibuundu yina ya fioti me kwikila Nsangu, mpe yina me telama mbote-mbote, na meso ya bawu ke tala na Kulunsu, na kati ya bantima ya bawu mvumbukulu ya Yesu Klisto, ke na kupela! Ya me kuma na kisika yina bayinsi fwana kundima Yawu. Ya me kuma na kisika ya kumeka ngolo. Kuyituka ve ti mabuundu... Ntangu Conseil ya Mabuundu, me fuluka na Communisme, kuyituka ve ti bawu lenda kwikila na mazulu ve. Kuyituka ve ti bawu lenda kwikila ve na kubeluka ya Kinzambi; bawu ke na Nsangu mosi ve na kati ya bantima ya bawu, ata yinki mutindu ba ke na kukima mbangu mingi.

⁶⁵ Kana Mpeve-Santu me kota na kati ya ntima ya muntu, yandi ke kwikila ti Yesu Klisto me vumbuka na lufwa, mpe Yandi ke zinga na kati ya yandi, samu na kusala, mpe samu na kusala luzolo yina Yandi me kwisa kusala; luzolo, luzolo ya Nzambi na kati ya luzingu ya muntu.

⁶⁶ Kasi, dyambu, beto ke kima mbangu, beto ke kwenda kukondwa Nsangu. Beto ke kwenda na théologie. Beto ke kwenda na mwa bantendulu ya dibuundu ya Masonuku.

67 Beto fwana kwenda na mvumbukulu! “Kwenda, tuba na bilandi ya Munu ti Mu ke sala organisation ya dibuundu ya malu-malu”? Ve, tata! “Kwenda, tuba na bilandi ya Munu ti Mu me vumbuka na lufwa, mutindu Mu tubaka ti Mu ke sala yawu.” Ya kele Nsangu samu na Dibuundu na suka yayi, ti Yesu kele ya kufwa ve. Yandi ke zinga, mpe na nene mpe ngolo bubu yayi mutindu Yandi vwandaka.

68 Beto me kuzwa bansangu mingi ya nkebolo, samu na kukubama, Paul Revere mpe bantu yankaka ya nene, mpe bamvita ya nene mpe bitembo, mpe nionso yina.

69 Na yina, Nzambi ke fidisa Nsangu ya kikesa, diaka. Yayi vwandaka Nsangu ya kikesa.

70 Mwa ntangu me luta, ntangu ya vwandaka na kimpika na Sud, ba-Boers kwisaka na ba-autochtone katuka na Afrique du Sud, yina beto ke bokila, bubu yayi, “muntu ndombe.” Mpe bawu nataka bawu awa mpe tekisaka bawu na ba-Américain na Sud, samu na kusala bawu bampika.

71 Ba-mavwanga ya nene samu na yawu na Afrique bubu yayi, kufwa bantu, mpe nionso yina, ke na kulandila. Ba ke na kunwana samu na kimpwanza ya bawu. Ba ke na muswa ya kunwana samu na yawu. Nzambi salaka muntu; muntu me sala bampika. Ya me kanisamaka ata fioti ve.

72 Mwa bamvula fioti me luta, mu vwandaka na colisée, to musée mosi ya nene, mu zola tuba. Mu vwandaka tambula bisika nyonso, mu vwandaka tala bafoto ya mutindu na mutindu mpe bima, samu ti mu ke zolaka art. Mu banza ti Nzambi kele na art. Mpe mu kwendaka kuna, mpe mu monaka ti ya vwandaka na bakala mosi ya Nègre, yandi vwandaka kieleka kiboba, na mapeka ya yandi ya kubukama, kaka mwa selekele ya bansuki na manima ya yintu ya yandi. Yandi vwandaka me lwata yimpu ya yandi. Mpe yandi vwandaka tambula bisika nyonso, mpe kima mosi mutindu *yina*, ya vwandaka tala bisika nyonso, mutindu ti yandi vwandaka tala to vwandaka sosa kima mosi na kati ya musée. Mu telamaka kuna na manima mpe mu talaka yandi na mwa ntangu fioti.

73 Mpe na manima ya mwa ntangu fioti yandi kumaka na ntwala ya mwa caisse mosi kuna. Mpe yandi talaka na kati ya yawu, mpe yandi yitukaka na mbala mosi, mpe yandi zibulaka kieleka meso ya yandi. Yandi lemukaka na manima ya caisse na muniti mosi, yandi katulaka mwa yimpu ya yandi mutindu kifiniku, yandi simbaka yawu na diboko ya yandi. Mpe mu vwandaka tala yandi. Mpe na yina kiboba yayi ya ndombe kulumusaka yintu ya yandi, masa ya meso bandaka na kunoka na matama ya yandi. Mpe mu talaka yandi na kuyituka, kieleka na mwa ntangu fioti.

74 Na yina mu banzaka, “Mu ke zaba samu na yinki kiboba yayi vwandaka na ntima ya kuzanguka.” Mu landilaka na kukwenda

na lweka *yayi*, mpe ya monanaka samu na munu mutindu robe mosi kuna na kati.

⁷⁵ Mpe mu talaka yandi ya kutelama kuna. Mpe mu kwendaka kuna, mu tubaka, “Mbote na nge, noko?”

Mpe yandi tubaka, “Mbote na nge, tata.”

⁷⁶ Mpe mu tubaka, “Mu kele longi. Mu me yituka na kumona nge ke sambila na kisika *yayi*.” Mu tubaka, “Mu ke kwikila ti nge kele Muklisto.”

Yandi tubaka, “Ya kieleka, tata.”

Mpe mu tubaka, “Samu na yinki ntima ya nge me vwanda ya kuzanguka mingi?”

⁷⁷ Yandi tubaka, “Kwisa awa.” Mpe mu kwendaka na kiboba yina, kuna. Yandi tubaka, “Nge ke mona robe yina?”

Mu tubaka, “Yinga, tata.”

Yandi tubaka, “Nge ke mona ditona yina na zulu ya yawu?”

Mu tubaka, “Yinga, tata.”

Yandi tubaka, “Tula diboko ya nge na lweka ya munu.”

Mu tubaka, “Yinki kele kisika yina ngolo?”

⁷⁸ Yandi tubaka, “Mukaba ya kimpika lutaka kuna, kilumbu mosi. Mpe *yayi kele* menga ya Abraham Lincoln.” Yandi tubaka, “Menga ya yandi katulaka mukaba ya kimpika na munu.” Yandi tubaka, “Yina ke zangula ve ntima ya nge, mpe?”

⁷⁹ Mu telamaka kuna na kuyituka. Mu banzaka, “Kana menga ya Abraham Lincoln lendaka zangula—zangula ntima ya mpika, samu ya me katula mukaba ya kimpika na yandi, yinki lendaka sala Menga ya Yesu Klisto na bantu mutindu Rosella awa, yina vwandaka mpika ya malafu; samu na munu, muntu ya kufwa, muntu ya kulutula kiadi?” Yandi katulaka mukaba ya masumu na ntima ya munu. Ya lendaka zangula ntima ya muntu ve? Ya lendaka sala ve ti yandi kuvwanda na nsatu ya luswaswanu? Ya lendaka sala ve ti yandi kuvwanda na luzitu ntangu yandi ke banza na yawu? Beno lenda mona yinti ve kukondwa kukulumusa yintu ya beno, na mutindu nionso, na kuzabaka ti Yesu me vuukisa luzingu ya beno na zulu ya Yinti yina.

⁸⁰ Mutindu beto ke na kulandila, na mwa ntangu fioti, na bampika, mpe dibanza ya beto. Ya vwandaka na nsamunu mosi, Nsamunu ya Kimpwanza, yina ba ndimaka, mpe kilumbu mosi bampika lendaka vwanda na kimpwanza. Beno zaba ve, oh, kana beno me kutanaka ata fioti ve na Klisto, beno ke zaba ata fioti ve yina ya zola tuba na bampika yina. Ntangu nsangu mwanganaka, na yinsi ya muvimba, ti, “Beno ke vwanda na kimpwanza kilumbu kingandi, na kubasika ya ntangu. Beno ke vwanda na kimpwanza. Beno ke lwata diaka ve mikaba ya kimpika, to ba ke bula beno diaka fimbu ve. Kasi beno kele

na kimpwanza, mpe beno kele mwinsi ntoto ya Etats-Unis yayi ya nene. Beno kele diaka mpika ve, na manima ya kubasika ya mwini na suka kingandi.” Oh, na kivuvu ya nene ba vwandaka vingila.

⁸¹ Kana nsumuki lendaka mona yawu kaka! Kana nsumuki lendaka kuwa kaka Nsangu ya mbote ya kieleka! Ya ke kukota na dibuundu ve, kasi kulonga ya Nsangu ya mbote, ti beno lenda vwanda na kimpwanza ya disumu, ti beno lenda vwanda na kimpwanza ya kimbevo ya beno. “Na ntangu kingandi,” ya ke ntangu yina beno ke kwikila.

⁸² Beno zaba, bampika yina vwandaka bantima ya kuzanguka mpe na nsi ya kivuvu, ba vwandaka vingila ngunga yina ba ke vwanda na kimpwanza, na yina, ba me tuba na munu, ti ba vukanaka na nsongi ya mongo, bamama mpe bana ya fioti, bawu nionso vukanaka, mpe biboba yankaka. Mpe bawu mataka na zulu ya mongo, na kati-kati ya mpimpa. Bawu zabaka ntangu tongo ke tana mpe mwini ke basika, samu bawu kuvwanda na kimpwanza. Ya lendaka baka ve na zulu ya ba-seconde makumi tatu samu mwini kusema na zulu ya mongo, kasi bayankaka na kati ya bawu vwandaka kuna na zulu ya mongo, ba vwandaka tala, ba vwandaka tala. “Oh, ntangu mwini basikaka, ke vwanda na kimpwanza.” Yina vwandaka m-w-a-n-a [s-o-n na kingelezi—Mu]. . . to, m-w-i-n-i [s-u-n na kingelezi].

⁸³ Kasi ntangu M-w-a-n-a ke vumbuka mosi ya bilumbu yayi! Mpe ntangu M-w-a-n-a vumbukaka bamvula funda mosi na nkama yivwa me luta, Yandi zengaka mukaba nionso ya kimpika, Yandi tulaka konso mpika na kimpwanza, Yandi belusaka bimbevo nionso, Yandi pesaka kimpwanza na bayina kele na kimpika. Wapi mutindu beto lendaka mata mpe kutala!

⁸⁴ Mpe ntangu mwini basikaka, ntete, muntu yina vwandaka na kisika ya zulu mingi, monaka yawu, mpe yandi bokaka na muntu yina vwandaka na manima ya yandi, “Beto kele na kimpwanza!” Mpe muntu yina ya kulanda bokaka na muntu yina vwandaka ntama na nsi ya mingo, “Beto kele na kimpwanza!” Tii yawu kumaka tii na camp, “Beto kele na kimpwanza!” Samu, mwini vwandaka basika, ba vwandaka vingila, vingila, vingila ngunga yina.

⁸⁵ Wapi mutindu diaka beto lendaka vingila, bubu yayi, M-w-a-n-a ya Nzambi. Beto kele na kimpwanza ya disumu. Beto kele na kimpwanza ya miniololo. Beto kele na kimpwanza ya bikalulu. Beto kele na kimpwanza ya makaya, ya malafu, ya kulutisa ntangu na kunwa malafu, samu M-w-a-n-a ya Nzambi me vumbuka na ntoni mpe me zenga miniololo nionso. Lufundusu nionso me kwenda! Mfuka me futama. Kitumbu me futama. Masumu me sukwama, mpe beto kele na kimpwanza. Oh, beto kele na kimpwanza, bampangi! Kimpika? Kimpwanza,

ntangu Mwana ya Nzambi me telama na kubeluka ya nzutu na mapapu ya Yandi!

⁸⁶ Kilumbu mosi Yandi ke vumbuka na Kiti ya kimfumu, ke vutuka na zulu ya ntoto. Na manima beto ke vwanda na kimpwanza ya bampasi mpe bampukumunu, na kimpwanza ya bampasi nionso ya lufwa mpe nionso yina ke tambula na luzingu ya lufwa, samu na kuzinga na Yandi kukonda nsuka. Beto kele na kimpwanza. “Kwenda, tuba,” yawu yina kima ya kusala.

⁸⁷ Na ntangu ya Biblia, ya vwandaka na mvula jubilé vwandaka kwisa. Bantu yina ba tekisaka samu na bamfuka yina ba defaka. Ba vwandaka defa mfuka mosi mpe ba lendaka kufuta yawu ve, na yina ba vwandaka kwenda mpe vwandaka kukiteka bawu mosi na bantu, samu na kuvwanda bampika. Mpe ba ke vwanda bampika ya bawu, na kimpika ya bawu, luzingu ya bawu nionso. Kasi, mbala mingi, kilumbu ya lemvo vwandaka kwisa, yina me zabana mutindu mvula ya jubilé. Mpe ntangu mvula ya jubilé kwisaka, na yina nganga-Nzambi mosi vwandaka basika mpe vwandaka bula mpungi. Mpe mpungi yina vwandaka talisa na konso mpika, ata bantangu yikwa ya vwandaka sala kisalu mpe bantangu yikwa yandi fwana sala kisalu, ntangu mpungi yina vwandaka bula, mpika yina kumaka na kimpwanza. Yandi lendaka tulula nsengo mpe yandi ke vutuka na yinzo ya bana ya yandi. Yandi lendaka sala diaka ve, samu yandi me kuma na kimpwanza ntangu muningu ya mukembu me bula. Mpungi yina vwandaka pesa muningu ya yimbi ve, kasi ya vwandaka pesa muningu ya kieleka. Mpe bakala lendaka tulula kisadilu ya yandi, yandi ke vutuka na yinzo na kimpwanza ya kimpika.

⁸⁸ Na suka yayi, Biblia me tuba, “Mpe kana mpungi me pesa muningu ya yimbi, nani ke zaba yinki ya kusala?” Kana Biblia me longi ti Yesu Klisto me vumbuka na lufwa, Yandi kele mutindu mosi mazono, bubu yayi mpe kukonda nsuka, mpe bampungi yina beto ke na kuwa ke na kubula bubu yayi me tuba, “bilumbu ya bimangu me lutaka, ya ke na kima ve mutindu kubeluka ya Kinzambi,” nani ke zaba mutindu ya kukubama bawu mosi?

⁸⁹ Yina beto ke na yawu nsatu bubu yayi kele minati nsangu yina me pakulama na Nzambi! “Yandi me vumbuka na lufwa! Yandi kele mutindu mosi mazono, bubu yayi, mpe kukonda nsuka!” Yawu yina Nsangu ya kilumbu yayi.

⁹⁰ Oh, ya vwandaka na bansangu ya nene, kasi Paki me zenga yawu nionso! Bansangu ya nene; Paki vwandaka nionso ya yawu! Ntangu mvumbi... kukubamaka ti mbeni ya nsuka... Beto me mona bimbevo me beluka na Ngwisani ya Ntama. Beto me mona bimangu me siamisama na Ngwisani ya Ntama. Ba vision kwisaka na Ngwisani ya Ntama. Kasi muntu nionso kwendaka na ntoni, na kukiyufulaka kana ya lendaka vumbuka

diaka na lufwa. Kasi na suka ya Paki, ntangu bilandi yayi kuzwaka Nsangu ya kulutila nene yina muntu me kuzwaka ntete ve, yinki bawu kuzwaka? “Kwenda, tuba na bilandi ya munu, Mu me vumbuka na lufwa!” Ba me nunga lufwa!

⁹¹ Ya vwandaka na muntu ve na zulu ya ntoto, ata profete ve, ata muntu ya nene ve, ata muntu ya busantu ve yina lendaka nunga. . . Ba lendaka nunga kimbevo na Mpeve ya Nzambi. Ba lendaka nunga ntangu, na Mpeve ya nzambi, mpe kumona na ntuala bima yina ke kwisa. Ba lendaka nunga yawu. Kasi ya vwandaka ata fioti ve na muntu yina me pakulama na kupakulama me katuka na Nzambi, yina lendaka sala nsamunu yayi, “Mu lenda pesa luzingu ya Munu, mpe mu lenda kubaka yawu diaka. Beno kufwa nzutu yayi, Mu ke vumbula yawu na kilumbu ya tatu.” Ya me vwandaka ata fioti ve na muntu mosi yina lendaka sala nsamunu ya mutindu yina. Mpe ba vwandaka kukiyufula na kati ya bantima ya bawu, kana yayi lendaka vwanda kieleka to ve.

⁹² Kasi na suka ya Paki, bawu kuzwaka Nsangu, “Beno kwenda na yinza ya muvimba, beno longa Nsangu ya mbote na bantu nionso. Mu me vumbuka na lufwa. Tala, Mu kele na beno ntangu nionso, tii na nsuka ya yinza. Muntu yina ke kwikila mpe ke baka mbotika yandi ke kuzwa mpulusu, muntu yina ke kwikila ve ke kuzwa kitumbu. Mpe bidimbu yayi ke landa bayina ke kwikila: na Nkumbu ya munu ba ke basisa bampeve ya yimbi; ba ke tuba bandinga ya malu-malu; kana bawu kusimba banioka to bawu kunwa manganga ya yimbi yina ke kufwaka bantu, ya ke sala bawu yimbi ve; Kana bawu tetika maboko ya bawu na zulu ya bambevo, bawu ke beluka.” *Nsangu Ya Paki*, ya kele mosi ya bansangu ya kulutila mfunu. Ba me nunga lufwa!

⁹³ Beto banza na hero mosi. Napoléon, na bamvula makumi tatu, nungaka yinza. Yandi nungaka yinza, yandi bulaka fimbu na bayinsi nionso ba lendaka bula fimbu. Mpe yandi lembaka nzutu samu ya vwandaka na muntu yankaka ve samu na kunwana, yandi vwandaka mpe dilaka. Ya vwandaka na muntu yankaka ve samu na kunwana, kasi yandi salaka nsaka ya kukondwa kieleka. Makumi ya mafunda ya bakento ya kindumba vwandaka landa makesa ya yandi, yandi kwendaka na munduki mpe na mbele. Na mvula makumi tatu na tatu, yandi nungaka yinza. Kasi yandi vwandaka na ntangu mosi muntu yina vwandaka pekisa alkole, mpe yandi kufwaka muntu ya kwiti samu yandi salaka nsaka ya kukondwa kieleka. Yandi zimbanaka nsangu. Yandi nungaka, kasi yandi zimbanaka nsangu. Yandi kwendaka, kasi yandi zimbanaka yina yandi kwendilaka kuna.

⁹⁴ Mutindu mwana-bakala yina kimaka mbangu na competition, mutindu dibuundu ke na kukima mbangu bubu yayi, mutindu bantu ke na kukima mbangu, mutindu yinsi ke na kukima mbangu! Kisika ya beto ya kubumbama kele ba-bombe

atomique ve, kisika ya beto ya kubumbama kele Yesu Klisto mpe mvumbukulu ya Yandi.

⁹⁵ Napoléon zimbanaka kima ya kulutila mfunu. Yinki kuminaka yandi? Yandi kufwaka ya kubwa ya muvimba, zoba ya kinwa-malafu. Samu na yinki? Yandi salaka nsaka na kieleka ve, ata ti yandi nungaka yinza, na nzutu. Yandi kukubikaka makesa. Yandi vwandaka militaire mosi ya kulutila mayele, yandi bakaka bayinsi nionso mpe salaka bima (yina yandi) yina muntu yankaka lendaka sala ve to salaka ata fioti ve, kasi yandi zimbanaka yina vwandaka nsangu ya kieleka. Yandi bakaka yawu, mpe yandi vwandaka na ngolo ya militaire, kasi yandi zimbanaka ngolo ya Mfumu.

⁹⁶ Ngolo ya Mfumu kele kivuvu ya beto. Beto ke na ngolo yankaka ve. Mu ke na kisika yankaka ya kubumbama ve, ata mosi ve! Nzambi kuwa munu mawa! Baka luzingu ya munu, kasi kubika ata fioti ve mu zimbanaka kisika me katuka ngolo ya munu. Yawu me katuka na Mfumu! Mu ke zola ve bima ya kitoko ya yinza. Mu ke zola Yesu, mu ke zola mvumbukulu ya Yandi yina ke pela na kati ya luzingu ya munu.

⁹⁷ Wapi mutindu yina vwandaka luswaswanu na Yesu Klisto na bamvula makumi tatu na tatu! Na bamvula makumi tatu na tatu, Yesu kuzwaka bima nionso; Yandi salaka yinza. Mpe Yandi vwandaka na yinza, mpe yinza zabaka Yandi ve. Yandi salaka yawu ata fioti samu na lukumu ya Yandi mosi. Yandi vukisaka ata fioti ve ba-militaire. Yandi salaka ata fioti ve organisation na mabuundu. Yandi bakaka ata fioti ve bankumbu ya nene samu na Yandi mosi. Yandi kwisaka ata fioti ve na ba-diplome ya lulendo ya malongi, ya théologie, mpe nionso yina, ya vwandaka ata fioti ve na kisika yina Yandi kotaka na lukolo ya théologie. Kasi Yandi vwandaka na Nzambi. Yandi vwandaka na Nzambi. Mpe na bamvula makumi tatu na tatu, Yandi nungaka bampeve nionso ya yimbi yina basisaka yintu ya yawu na difelo. Yandi nungaka bimbevo. Yandi nungaka balukwikilu ya mabanza. Yandi nungaka bampeve ya yimbi. Yandi nungaka lufwa. Mpe ntangu Yandi kufwaka na Kulunsi, Yandi kulumukaka na dibenga ya yinda ya difelo, mpe nungaka difelo.

⁹⁸ Mpe na suka ya Paki Yandi nungaka ntoni. Samu na yinki? Yandi salaka nsaka ya kieleka, Yandi kimaka mbangu na Nsangu. Yandi vwandaka, Yandi me kwenda! “Kwenda.” Nzambi fidisaka Yandi, mpe Yandi vwandaka na Nsangu ya kutuba na bawu. Mpe na Nsangu yina Nzambi pesaka Yandi, Yandi nungaka bangolo ya Satana. Yandi nungaka bimbevo. Yandi nungaka lufwa. Yandi nungaka difelo. Yandi nungaka ntoni. Samu na yinki? Yandi kwendaka! “Kwenda, tuba!” “Mu ke salaka ntangu nionso yina Tata ya Munu ke talisa Munu na kusala. Mu ke salaka kima mosi ve kasi yina Yandi ke tuba na Munu na kusala.”

⁹⁹ Na yina na ntwala Yandi kufwa, Yandi tubaka mutindu yayi, “Mutindu Tata fidisaka Munu, Munu mpe ke fidisa beno.” Samu na kutunga bantu na ngolo ya ba-militaire ve; samu na kutula ntangu ya beno nionso na yina ke vwanda Ntwadisi ya yinsi ve. Ya lendaka vwanda na mfunu, kasi na mfunu ve kati na *Yayi*. Yinza me kwenda. Beto ke na Nsangu mosi, ti, Yesu Klisto me vumbuka na lufwa, mpe Yandi kele mutindu mosi mazono, bubu yayi, mpe kukonda nsuka.

¹⁰⁰ Mazono, na mwa kivinga ya lusambusu, ba vwandaka meka na kusala ti mu tuba kima yina vwandaka kieleka ve. Mu tubaka, “Mu ke muntu ya luvunu ve.” Mu tubaka, “Mu ke—mu ke—mu ke muntu ya kieleka. Mpe beno lenda tuba diaka ve kasi yina kele kieleka.”

¹⁰¹ Mpe bakala mosi vwandaka na munu, yandi tubaka, “Kana muntu ke tuba na munu mutindu yina, mu ke kuwa mutindu mu losa yandi buku.”

¹⁰² Muu tubaka, “Ve, tata. Ve, yina ke mbote ve. Yina ke mutindu ya belama na yawu ve. Yina ke mbote ve.”

¹⁰³ Yandi tubaka, “Mbote, samu na yinki nge me zaba ve bima yayi ke na kusalama? Samu na yinki nge ke kwenda kuna ve samu na yawu?”

 Mu tubaka, “Mu ke lutisa ntangu ya munu na kusadila Yesu Klisto.”

¹⁰⁴ O Nzambi, oh, bantu kele ya kufwa meso mpe bawu lenda kumona yawu ve! “Mutindu Tata fidisaka Munu,” Tata fidisaka Yandi, Yandi kwendaka. Yandi vwandaka na Nsangu ya kutuba na bantu. Mpe na ngunga ya lufwa, Yandi nungaka lufwa mpe Yandi nungaka difelo, mpe Yandi nungaka ntoni. “Mutindu Tata fidisaka Munu na Nsangu, Munu mpe ke fidisa beno na Nsangu; ya kele ve samu na kutunga bayinzo-Nzambi, ba-organisation, kasi beno kwenda na yinza ya muvimba mpe beno talisa Ngolo ya Mpeve-Santu. Bidimbu yayi ke landa bayina ke kwikila; na Nkumbu ya Munu ba ke basisa bampeve ya yimbi, ba ke tuba bandinga ya malu-malu, ba ke simba banioka.” Mpe mutindu banzutu ya beto ke kwenda na ntoni, mutindu Yandi salaka, Yandi me nunga lufwa, difelo, mpe ntoni. Yandi kele Héro ya ngolo.

¹⁰⁵ Yandi ke fidisa beto na Nsangu ya Yandi. Beto kwenda na Nsangu, beto kwenda na kima mosi ya kutuba. Kwenda, tuba! Beno kima mbangu ve na manima beno ke vwanda na kiyeka ya kutuba ve; beno vwanda na yawu ntete na kati ya ntima ya beto.

¹⁰⁶ Ntangu beno ke kwisa samu ba sambila samu na beno, na suka yayi, beno kwisa ve na mutindu ya kisaka-saka. Beno kwisa na Nsangu na kati ya ntima ya beno, “Mu kele Yandi yina kufwaka, mpe Mu ke zinga diaka. Mu kele Mosi yina ke pesa Nsangu, ‘bidimbu yayi ke landa bayina ke kwikila.’ Kana Nzambi ya Ngolo nionso lendaka baka bébé ya fioti yina kele

na meso na lweka mpe kusungika meso ya yandi mbote-mbote; Nzambi lendaka baka bébé mosi, mosi, bébé mosi ya bakala yina me butuka, yina me monaka ata fioti ve na luzingu ya yandi, mpe ya bamvula kumi na sambanu, kuvutudila yandi meso ya yandi; Nzambi lenda baka muntu ya kiadi yina me diama na cancer . . .

¹⁰⁷ Mpe samu Nsangu kele ya kusungama, samu Nzambi me fidisa Nsangu, samu Nzambi me fidisa munati nsangu, na ntembe ve ti minduki nionso ya difelo ke vwanda ya kuludika na yandi. Ya kieleka, yandi ke bula disakuba mpe yandi ke kubwa, mpe yandi ke vumbuka mpe yandi ke ningisa yintu ya yandi, mpe yandi ke kwenda na ntuala. Beto ke na Nsangu mosi, kima mosi ve ke kanga Yawu nzila! Alleluia! “Na zulu ya ditadi yayi Mu ke tunga Dibuundu ya Munu, mpe bamwelo ya difelo ke nunga Yawu ata fioti ve.” Ba lenda tuba yina bawu me zola, ba lenda sala yina bawu me zola, diabulu lenda baka nganzi mpe kuboka ngolo. Kasi Yesu me vumbuka na lufwa, Yandi ke zinga bubu yayi na kati ya beto!

¹⁰⁸ Mwa bilumbu fioti me luta, mu vwandaka tuba na Docteur ya nene Lamsa, yina bangulaka Biblia katuka na Araméen, na Kingelesi. Mpe mu monaka mwa kidimbu yina, kidimbu ya Nzambi na zulu kuna, na mwa ba-point tatu na kati ya yawu. Mu tubaka, “Docteur Lamsa, yinki yina kele?”

Yandi tubaka, “Ya kele Nzambi, na bisalu tatu.”

¹⁰⁹ Mpe mu tubaka, “Nge zola tuba ti, Nzambi ke zingaka na kati ya bisalu tatu, mutindu, Tata, Mwana, mpe Mpeve-Santu?”

¹¹⁰ Yandi vumbukaka mpe yandi talaka munu, masa ya meso fulukaka na meso ya Juif yina, yandi tubaka, “Nge ke kwikilaka yawu, Mpangi Branham?”

Mu tubaka, “Na nionso yina kele na kati ya ntima ya munu.”

¹¹¹ Yandi losaka maboko ya yandi na zulu ya munu, mpe yandi tubaka, “Mu vwandaka kukiyufula ntangu mu monaka bima yina ya nene vwandaka salama, mpe bidimbu yina nge vwandaka sala.” Yandi tubaka ti, “Ba me tuba na munu ti nge kele profete. Mu kwikilaka na yawu ve, tii na ntangu yayi. Ntangu yayi mu zaba ti nge kele profete.” Yandi tubaka, “Yawu yina! Yawu yina Nsangu. Ya kele kima yina ke ningisa Kimfumu ya Nzambi.” Yinga. Yandi tubaka, “Kilumbu mosi nge ke kufwa samu na yawu, mwana.” Yandi tubaka, “Nge ke kanga kimbangi ya nge na kima yina kaka.”

¹¹² Mosi ya muntu ya kulutila nene beto me kuzwa, ntangu Eisenhower mpe bantu ya nene ya yinza, Hollywood, ba-star ya mutindu na mutindu ya cinema mpe nionso ke bokila yandi, kasi ya ke ya kunamika kuna na kati ya lukutakanu. Yandi tubaka “Mu me sala mwa bamvula makumi tatu ya luswaswanu, na kusalaka lubangulu yayi, katuka na Grec ya Vatican ve, kasi katuka Araméen; katuka na yina mbala mosi, katuka na Araméen, tii na Kingelesi.” Mpe yandi tubaka, “Mu me lutisa

ntangu yina nionso,” yandi tubaka, “Mu me kuma ntangu yayi na kisika yina mu me mona Nzambi ya Biblia, ke na kutambula.” Yandi tubaka, “Nge zaba, Mpangi Branham, beto lenda mona bidimbu mpe mambu ya ngitukulu, kasi beto ke tala yinki Ndinga kidimbu ke na yawu. Beto ba-Juif, beto ke tala kidimbu mosi, kasi beto ke talaka Ndinga ya kidimbu.”

113 Oh, alleluia, Ndinga ya kidimbu! Nzambi tubaka na Moise, “Kana bawu kuwa ve Ndinga, Ndinga ya kidimbu ya ntete, na yina bawu ke kuwa Ndinga ya kidimbu ya zole.” Ya kele ve mingi ya kidimbu, kasi Ndinga yina kwendaka na yawu.

114 Beno me mona, Juif yina, yandi me zaba yina yandi vwandaka tuba. Yandi tubaka, “Mu me mona kuswasikisa mabanza, mu me monaka bidimbu, mambu ya ngitukulu, bampofo ke beluka, mpe bidimbu ya mutindu na mutindu, kasi mu vwandaka kukiyufula, kasi ntangu yayi mu me mona Ndinga na manima ya yawu ke zenga ve Nzambi na bitini tatu, mpe yandi tubaka, ‘Yandi kele Nzambi mosi, Tata, mpe na manima, Mwana, . . .’ Yandi tubaka, ‘Nzambi kele Nzambi: bisalu tatu ya Nzambi; bisalu tatu ya Nzambi.’” Yandi tubaka, “Yina ke siamisa yawu.”

115 Oh, mpangi-bakala, beto kele na Nsangu! “Kwenda, tuba na bilandi ya Munu! Mu vwandaka ve *mosi* yina kufwaka, mpe *yina* kele pene na kufwa, mpe *yankaka* ke na kuzinga. Mu kele Yandi yina Vwandaka, yina Kele, mpe Ke Kwisa; Nsimbulu mpe Dikanda ya David; Mbwetete ya Nsemo mpe ya Suka.” Yinga!

116 Yinki mbote ya ke sala, na kukwenda, kana beno ke na kima ya kutuba ve? Beno fwana vwanda na kima ya kutuba, ya kieleka: “Yesu Klisto, Mwana ya Nzambi, ke zolaka beno nionso. Yandi kufwaka samu na beno nionso. Beno zola Yesu Klisto Mwana ya Nzambi.”

117 Bantu yikwa me vwandaka ntete na balukutakanu, mpe yina me monaka bidimbu ya nene mpe mambu ya ngitukulu ya kumonana ya Yandi—ya Yandi, ya mutindu Yandi ke swasikisaka mabanza mpe ke talisa, mpe bima nionso yina? Yina kele Nzambi ya Zulu, Yina vumbukaka na lufwa.

118 Beno fwana mona kidimbu ya kidimbu ya Hebreu samu na Yawu. Ya ke Nsemo, mutindu Dikunzi ya Tiya, mpe kuna na kati kele na mwa bidimbu tatu, Tata, Mwana, mpe Mpeve-Santu, yina vwandaka bantu tatu ve. Ya vwandaka Nzambi mosi yina ke zinga na bisalu tatu. Nzambi ya mutindu mosi! Alleluia! Nzambi na zulu ya beno, Nzambi kintwadi na beno, Nzambi na kati ya beno. Mosi yina ke kukikulumusa Yandi mosi, ke sukula Dibuundu ya Yandi, ti Yandi fwana zinga. Ntangu beno ke zenga Yandi na bitini, mpe beno ke tula mosi *awa*, mpe mosi *yankaka awa*, mosi *kuna*, ya ke kimumpuni mutindu ya lendaka vwanda.

119 Mu ke kwikilaka na mvumbukulu ya Yesu Klisto, yina me vumbuka na lufwa. Mpe Yandi vwandaka Muntu mosi kaka lendaka tuba ti, “Bangolo nionso na Mazulu mpe na ntoto me

pesama na maboko ya Munu. Bangolo nionso ya Mazulu mpe na ntoto me pesama na maboko ya Munu. Beno kwenda na yinza ya muvimba, samu na kumwangisa nsangu ya mbote na bantu nionso.” Nsangu ya mbote me kwisa kaka na ndinga ve, kasi na ngolo mpe bakutalisama ya Mpeve-Santu. Nzambi kusadisa beno na kukwikila yawu, Nzambi kusadisa beno na kukwikila yawu, mpe beto ke mona Yesu kilumbu mosi.

Ntangu minianga ya luzingu ke suka, beto ke mona Yesu na nsuka;
Na zulu ya Kiti ya Yandi ya kimfumu ya kitoko,
Yandi ke yamba munu na Yinzo,
Na manima kilumbu ke kuma na nsuka. (Ya kieleka.)

Putulu ke sukwama na bitambi
Ya Nzenza yina ya kumu ya Galilée.

¹²⁰ Bawu kufwaka Yandi samu Yandi kukusalaka Yandi mosi Nzambi, mpe Yandi vwandaka Nzambi. Ba komaka Yandi, samu, Yandi kufwaka na nsi ya kitumbu ya lufwa. Yawu yina mu ke kwikilaka ve na kitumbu ya lufwa. Yesu kufwaka na nsi ya kitumbu ya kitumbu ya lufwa ya gouvernement fédéral ya Rome. Kitumbu ya lufwa, vwandaka, kukoma na kulunsi. Yandi kufwaka na nsi ya kitumbu ya lufwa, ba katulaka Yandi bilele, mpe ba komaka yandi kuna, ba talisaka Yandi nsoni, mpe Yandi kufwaka mutindu yina. Kasi Nzambi vumbulaka Yandi na lufwa na kilumbu ya tatu!

¹²¹ Mpe beto kele bambangi ya Yandi. Mpe beto telama na lweka ya Yandi ve, nani ke telama na lweka ya Yandi?

¹²² Bakala mosi kukutanaka na munu kilumbu yina, yandi tubaka, “Oh, Mpangi Branham, kutuba ve. Nge ke sukisa na kutuba. Nge—nge ke lwadisa bansatu ya bakento, samu bawu ke na bansuki ya nkufi, mpe samu ba ke sala *yayi* mpe ba ke sala *yina*, mpe nionso yina ya mutindu yina.”

¹²³ Mu tubaka, “Kana mu tuba na bawu ve, nani ke tuba na bawu? Nani ke tuba yawu?”

Yandi tubaka, “Mbote, nge ke pesa nganzi na milongi ya bawu.”

¹²⁴ Mu ke sepela bawu kudasuka na munu, kasi Yandi ve. Ya kele Kieleka. Ya kieleka! [Kisika ya mpamba na bande—Mu.] Ya kieleka. Nani ke tuba yawu? Muntu mosi fwana tuba yawu.

¹²⁵ Yesu tubaka, “Kwenda, tuba. Kwenda mpe tuba, tuba na bilandi ya Munu ti Mu me vumbuka na lufwa. [Kisika ya mpamba na bande—Mu.] Tala, Mu kele ntangu nionso na beno, tii na nsuka ya yinza.”

¹²⁶ Beno me kwikila yawu, bankundi?

Beto sambila, na yina beto ke kulumusa bayintu ya beto ntangu yayi samu na kisambu.

127 O Tata Nzambi! Ya kieleka, “Kwenda, tuba. Kwenda, tuba na bilandi ya Munu ti mu me vumbuka na lufwa.” Mpe Tata Nzambi, Nge me tuba kaka na bilandi ya Nge ve, kasi Nge me siamisa na bawu ti Nge me vumbuka na lufwa. Nge me kukitalisa Nge mosi na bawu, mpe Nge me sala kaka ya kieleka mutindu Nge salaka na ntwala Nge ke kufwa. Bamvula funda mosi na nkama yivwa me luta, Mfumu, Nsangu ke na kupela kaka. Ya ke na kusema kaka mpe ya ke na kupela na kati ya bantima ya beto bubu yayi mutindu ya vwandaka na bilandi, samu beto ke mona Mfumu yina me vumbuka na lufwa na kati-kati ya beto, na kusalaka bima yina Yandi salaka ntete. Beto zaba ti Yandi me vumbuka na lufwa.

128 Paki zola tuba mingi samu na beto, samu beto me vukana mpe beto ke sepela na kimpangi ya mvumbukulu ya Yandi. Samu beto vwandaka ya kufwa na masumu mpe bayimbi, mutindu mwana yina zimbanaka, kasi ntangu yayi beto me kuzwa lemvo, mpe Nzambi me lemvokila beto na masumu ya beto. Yandi me pesa beto diaka Kidimbu, mutindu Yandi salaka na Tata Abraham, samu na kusiamisa ti Yandi me ndima beto. Tata Abraham tubaka ti yandi kwikilaka Nzambi, kasi Yandi pesaka yandi kidimbu ya nzengolo mutindu nsiamisa ti yandi me kwikila na Yandi. Mpe ntangu yayi, Tata, bubu yayi beto me baka nzengolo na nzila ya Mpeve-Santu, bima nionso ya yinza me luta. Beto ke na lukanu mosi: kusadila Nge. Beto ke na nsatu mosi: kuzola Nge, kuvwanda kilandi ya Nge.

129 Mpe ntangu yayi, Mfumu, mu ke sambila ti Nge ke siamisa mwa nsangu yayi ya bitini-bitini na konso ntima. Bika ti bawu kuzimbana yawu ve. Bika ti bawu kumona ti Nge kele mutindu mosi mazono, bubu yayi, mpe kukonda nsuka, ti nge kele awa, Nge me vumbuka na lufwa, mpe Nge ke vwanda tii kuna Mpeve mpe nzutu ke vukana diaka kintwadi na Nkwizulu ya Zole.

130 Mu ke sambila samu na bambevo yina kele awa, Tata, na suka yayi. Mu kele ntangu yayi, na suka yayi ya Paki, mu me tula na lweka (to, mu me tula na lweka ve, kasi mu me tula yawu na lweka na mwa ntangu fioti) makabu yina Nge me pesa munu, mutindu kuswasikisa mabanza. Yinza, mu me tambula bisika nionso na bayinsi nionso, Mfumu, bawu nionso me zaba yawu. Ntangu yayi mu ke sambila, ti, Nsangu yina Nge me pesa munu awa na mfinda, yina, na mwa bilumbu fioti me luta, ti, na zulu ya ngolo ya luvangu yina me vwanda na kati ya dibuundu yayi na suka yayi, bantu yina yawu vangaka, Mu ke sambila, Nzambi, na yina mu ke kwisa tetika maboko ya munu na zulu ya bambevo na suka yayi, na bampangi ya munu awa, ti Nge ke kulumuka na zulu ya dibuundu yayi na suka yayi, na mawa, mpe ti Nge ke belusa bantu, ti ya ke vwanda ve na muntu mosi ya kulemba na kati ya beto ntangu lukutakanu ke kuma na nsuka. Bika ti mosi na mosi ya bawu kusakumuka mpe kubeluka.

¹³¹ Beto ke mona ti, Mfumu, ya ke na kima mosi ve beto lenda sala beto mosi. Ya ke kaka mutindu lukwikilu ya mwana ya fioti, ke kwikila. Beto lenda mona bilandi na manima ba pesaka bawu ngolo ya kubelusa bambevo, bawu kwendaka mpe ba lembanaka muntu ya kimbevo ya épilepsie; ba vwandaka boka mpe ke sala makelele, ntangu yankaka ba vwandaka dumuka na zulu mpe na ntoto, mpe ba vwandaka meka na kusala ti mpeve ya yimbi kukwenda. Kasi ntangu yandi kutanaka na Yesu, oh, ya vwandaka luswaswanu. Yandi tubaka, “Nge mpeve ya yimbi, basika na yandi.” Yina kele luswaswanu. Oh, yandi zabaka ti yina vwandaka ntumwa ve. Yina vwandaka Mfumu Yandi mosi. Mpe mpeve pasulaka mwana-bakala yango mpe losaka yandi na ntoto. Kasi Yesu tubaka, “Yandi me kufwa ve. Beno vumbula yandi kaka mpe beno pesa yandi madia.” Mpeve ya yimbi bikaka yandi.

¹³² O Yesu, Nge Mwana ya Nzambi, kwisa diaka, pakula pwelele Dibuundu ya Nge, ya kifuluka, na ngolo. Bika ti Mpeve ya moyo ya Yesu yina vumbukaka kuvumbula mwa dibuundu yayi na suka yayi na lukwikilu ya malu-malu, na ngolo, na ngolo ya lukwikilu, ti beto lenda tula ba-opposant nionso na nsoni. Pesa yawu, Mfumu. Mu ke pesa bantu yayi nionso na Nge, mu ke lomba ti Nge ke sakumuna bawu mpe ke pesa bawu Mpulusu na mioyo ya bawu, na kubelusaka banzutu ya bawu, na Yesu Klisto Mfumu ya beto.

¹³³ Mpe na bayintu ya beto ya kukulumusa, mu ke yufula kiuvu mosi. Ya ke na muntu mosi awa yina kele Muklisto ve, yina ke zola ti ba bambuka moyo na yandi ntangu yayi, mpe yandi tuba, “Sambila samu na munu, Mpangi Branham”? Nzambi sakumuna nge kuna. Muntu yankaka, “Mu ke Muklisto ve. Mu me kuwa bansangu ti Yesu me vumbuka na lufwa, kasi ya kieleka mu me zaba yawu ve. Yandi me vumbuka ata fioti ve na kati ya ntima ya munu. Mu ke na nsayi ve. Mu kele mbevo, diaka. Mu ke kwenda na ndonga ya bisambu, mu ke vutuka mpe mu ke kwenda na yina yankaka, mu ke vutuka mpe mu ke kwenda na yina yankaka. Mu ke kwenda na dibuundu mosi na yankaka, mpe sika na sika.” Yawu yina ve. Ya ke kukwikila Yandi. Yandi me vumbuka na lufwa. Yina me sukisa diambu. Muntu yankaka zola telemisa diboko ya yandi? Tuba . . . Nzambi sakumuna nge. Nzambi sakumuna nge. Muntu yankaka, “Mu ke zola kwikila. Mu ke zola kwikila?”

¹³⁴ Bantu yikwa kele bambevo na kati awa, beno telemisa diboko ya beno, beno tuba, “Mu ke zola kwikila. Mu ke zola zaba Nsangu ya suka yayi.” Nzambi sakumuna nge. Ya ke mbote. Yinga, Nzambi sakumuna nge, mwana-bakala. Mbote. Mbote mingi.

¹³⁵ Ntangu yayi, Teddy, mu ke zola ti nge kubula “*Dokotolo Ya Nene*,” na mwa minuti fioti, kana beno me zola, “kele awa ntangu yayi.” Mpangi na ntangu beno ke na kusala yawu . . .

¹³⁶ Ya ke mpasi ntangu yayi. Ba-vision ke na kupanzana bisika nionso na kivinga, beno me mona. Yinga, mu ke meka, mu vwandaka meka na kubika yayi kuvwanda mvumbukulu, ya mwa zulu mingi, ya mwa zulu mingi na—na mbombi yina mu me vwanda. Mu ke zola mwa luzayikisu ya kulutula mingi. Mu zaba kima mosi; ntangu nionso yina mu ke kangama na ministere yina ya ntete yina, ya zole ke kwisa ve, ya kwisaka ve. Ntangu yayi na ntangu nionso mu me kangama na yina ya zole, ya tatu ke kwisa ve, beno me mona. Mu fwana basika na mbala mosi, kubasika mpe kukwikila yawu, “Nzambi tubaka mutindu yina!” Mwa bilumbu fioti me luta . . .

¹³⁷ Ntangu yayi beno lenda telemisa bayintu ya beno ntangu yayi kana beno me zola. Mu me simba maboko ya beno; Nzambi me simba yawu.

¹³⁸ Mu ke zola tuba na beno mwa kima mosi ya fioti. Mpangi Ed Daulton, mu ke kwikila ti yandi me kota awa, mpangi-bakala ya Baptiste ya mbote, yandi na kento ya yandi. Mpangi Jeffries kele awa kisika mosi kuna. Othel Jeffries. Mpe yandi kele awa, mu me zaba ti yandi kele awa kisika mosi kuna. Na yina, bampangi yankaka me sala lukutakanu samu mu kwenda kuna, kuna na Kentucky. Bampangi, bampangi ya ntalu, bawu zola bankalani ya bawu mpe bantu ya bawu. Ba ke na bivinga ya nene mpe bivinga ya kubumba minduki mpe bima, kaka na lukutaknu mosi ya nkokila, ba me kudefa bivinga ya minduki. J. T. Hoover, ve yina yandi . . . L. G. Hoover me sala mosi kuna na Elizabethtown. Mpe Mpangi Ed Daulton kuna na Willow Shade to—to Somerset, Somerset. Mpe mpangi-bakala, mpangi-bakala yankaka kuna na Glasgow, kisika mu butukaka. Bantu yina kuna kisika mu me butuka mpe mu me kuula, kisika Wanzio ya Mfumu ntete monanaka na munu.

¹³⁹ Mpe mu zolaka vutuka. Kasi mu kuwaka mwa kubenda mosi. Mpe mu tubaka, “Mbote, samu na zola ya bampangi, mu ke sala lukutakanu.” Kaka na ntangu mu kumaka na kiwanda, laka ya munu kukangamaka mpe mu vwandaka tuba ve bilumbu yivwa, tii balukutakanu lutaka.

¹⁴⁰ Mpangi Ruddell, ntangu yankaka yandi kele awa na suka yayi, mpe, mosi ya bampangi ya tabernacle yayi, yandi na Junie Jackson mpe bayankaka, mu banzaka kuvwanda lukutakanu na yandi. Mpe na mbala mosi, laka ya munu kukangamaka. Mpe kima ya ntete beno zaba, mu salaka fièvre ya pene ya makumi yiya na ndambu. Mpe Mu vwandaka kwenda na lukutakanu, mpe—mpe Doc Schoen tubaka na munu . . . Mu tubaka, “Laka ya munu me kangama.”

¹⁴¹ Yandi tubaka, “Mu ke pesa kima mosi samu na kukangula laka yina, mpe nge ke kwenda na ntwala mpe nge ke longa.” Mpe mu bakaka kima yankaka yandi pesaka munu, mpe, yinki ya vwandaka, ya bendaka sinus yina na nsi mpe kangaka yawu. Na

manima mu vwandaka na mbeto bilumbu yivwa, kaka na fièvre ya ngolo mingi.

¹⁴² Mingi na kati ya beno bampangi ya munu awa kwisaka na munu, mingi ya bampangi-babakala yina me zabana mingi kwisaka samu na kusambila samu na munu. Awa kwisaka Mpangi Graham Snelling, awa kwisaka Mpangi Ruddell, bampangi yayi nionso awa, bawu nionso vukanaka kuna, samu na kusambila mpe bima yankaka nionso. Mu vwandaka sambila, mu vwandaka meka na mutindu nionso, mu lendaka ve kutuba ata na ndinga ya nsi. Mu kukiyufulaka, “Samu na yinki nionso yayi?” Kento ya munu ya luzolo vwandaka ya kuvwanda kuna, yandi na bantu yankaka vwandaka sambila samu na munu, kasi ya vwandaka kaka mutindu mosi. ba lendaka bakula yawu ve.

¹⁴³ Ntangu yayi, yandi pesaka munu mwa bankisi samu na kunwa, kasi mu bakaka yawu ve, samu ya vwandaka drogoue. Na manima mu bikaka yawu kaka kukwenda. Mpe mu landilaka kaka na kubanza, “Mfumu, ya kieleka!”

¹⁴⁴ Na yina, na manima balukutakanu lutaka, na Kilumbu ya ntete (ya vwandaka, lukutakanu ya nsuka, zolaka vwanda na Kilumbu ya sambanu), na manima (mu ke kwikila), na yina, na Kilumbu ya ntete mu mekaka na kuvumbuka. Mu vwandaka ya kulemba mingi, mu lendaka basika ve na kivinga. Mu vwandaka ya kuvwanda.

¹⁴⁵ Beno zaba, mu ke vutula matondo mingi samu na kento yina Nzambi pesaka munu. Mutindu yina ve, bampangi? Kento ya kieleka, nkundi ya kieleka!

¹⁴⁶ Mu vwandaka ya kuvwanda. Mu tekulaka yandi, mpe mu pusaka yandi pene-pene ya munu. Mpe mu tubaka, “Meda, na bantangu yankaka mu ke kukiyufula,” mu tubaka, “Mu ke kukiyufula, yinki kele diambu.” Mu tubaka, “Samu na yinki balukutakanu yina kele kuna, mpe Nzambi me bika munu ya kulala mutindu yayi?” Mu tubaka, “Samu na yinki ya me salama mutindu yayi?” Mpe mu tubaka, “na bantangu yankaka mu ke kukiyufula kana Yandi me bokila munu.”

¹⁴⁷ Yandi tubaka, “Nge ke na nsoni ya nge mosi ve?” Beno me mona? Mpe yandi tubaka na munu, yandi tubaka, “Bill, nge me zaba ve ti Nzambi me zaba yina Yandi ke na kusala na nge? Vwanda kaka, kaka swi.”

¹⁴⁸ Mpe na yawu mu kwendaka. Yina nganinaka munu fioti, beno zaba. Mpe na yawu mu kwendaka mpe mu lalaka na mbeto. Yandi kwisaka sobisa bilele ya mbeto. Mpe yandi vwandaka na bima na zulu ya diboko ya yandi, ntangu yandi bandaka, mu talaka, mpe ya vwandaka . . .

¹⁴⁹ Mu monaka ki- . . . kivinga ya nene ya minduki, yina mwini me semisa mpe pasula na zulu ya ntoto, ya me panza yawu bitini-bitini, mwini vwandaka sema katuka na Zulu. Mpe bakento tatu na bakala mosi kwisaka kuna, yina kwisaka. Mpe ba vwandaka

mutindu na mwa bima ya fioti, mutindu mwa . . . mutindu mwa munduki ya tiya, mutindu yina. Mpe yandi tubaka, “Yina ke kotisa misonso mbote-mbote.” Mpe yandi tubaka, “Beto ke . . . Nge simba bitini yayi, Mpangi Branham, mpe beto ke tunga kivinga yayi ya minduki samu na nge.”

Mpe mu tubaka, “Mbote mingi, mu ke sala yawu.”

¹⁵⁰ Kasi Kima mosi tubaka, “Kusala mutindu yina ve.” Mbote, mu tandaka diboko samu na kusimba kitini mosi, mutindu *yayi*, samu na kutunga yawu mutindu *yayi*. Mpe kaka na ntangu yina Ndinga mosi tubaka na munu, mpe zonzaka, “Ntangu yayi ba ke na nzila samu na kuvutula nge. Kukwikila yawu ve.” Yandi tubaka, “Ba kele kieleka ya kusungama, mpe ba ke na kwisa na nge na MUTINDU ME TUBA MFUMU, kasi ba kele na luvunu.” Beno me mona?

¹⁵¹ Fred Sothmann, mingi na kati ya beno awa, vwandaka kaka kuna ntangu mu tubaka yawu na bawu. Na nsi ya ngunga mosi, bantu kwendaka tii na kielo ya munu. Mu tubaka, “Ya ke na bakento tatu na bakala mosi.”

“Ya kieleka ya kele ya kulunga.”

“Bawu kwisaka na MUTINDU ME TUBA MFUMU?”

“Yinga, tata, bawu . . .”

¹⁵² Mu tubaka, “Ya kieleka, beno me zaba yinki kutuba na bawu.” Ya kieleka luvunu, beno me mona. Bantu ya mbote, kasi ya kusungama na luvunu. Beno me mona?

¹⁵³ Na yina mu banzaka, “Mbote, yinki mu lenda sala? Yinki mu fwana sala?” Na manima Meda kwisaka, mpe yandi kwendaka na mukongo. Mpe Mpangi Freddie kwendaka mpe tubaka na bantu yango. Na yina na manima ya mwa ntangu fioti, mu vwandaka na kati kuna na zulu—na zulu ya mbeto, mpe mu banzaka, “Samu na yinki ya ke salama mutindu yayi? Samu na yinki mu lenda tuba ve? Samu na yinki mu lenda solula na muntu ve, to kima mosi?” Mpe mu vwandaka ya kulala kuna. Mpe Meda me kwisa, mpe vwandaka kwenda na manima ya kivinga.

¹⁵⁴ Mpe mu talaka, mpe mu monaka kima mosi kungenga na lweka mosi. Mpe mu talaka, mpe kuna vwandaka yayi . . . kibaka ya munu zibukaka, mpe mu monaka Yesu. Bantu yikwa na kati ya beno me kuwaka munu kutuba ti mu me mona Yesu bambala zole na luzingu ya munu, na vision? Mpe mu me kwikila ti mu ke mona Yandi diaka na ntwala ya nsuka ya ntangu, mu ke mona, mu ke mona Yandi diaka. Ntangu yayi, mu talaka, mpe mazulu vwandaka kaka kuna, ya monanaka kaka mutindu mu vwandaka tala na kati ya kibaka. Mpe ya vwandaka na Biblia ya kutelama kuna mutindu *yayi*, Biblia mosi ya nene mingi kuna na mazulu. Mbote, ya vwandaka na kima mosi vwandaka na nsemo pene-pene ya Biblia, mpe na nganda ya Biblia kwisaka kulunsi mosi ya kieleka ya kitoko ya wolo. Mpe yawu telama kuna

mutindu *yayi*, mpe bansemo kwisaka sika nionso pene-pene ya yawu, mpe na nganda ya kulunsi yina Yandi vwandaka tambula. Biblia vwandaka talisa kulunsi, kulunsi vwandaka talisa Yandi. Mpe Yandi kwisaka kuna, mpe kwisaka tii kisika mu vwandaka. Mu lendaka mona yawu kaka pwelele, mu lendaka mona kulunsi yina ke talisa bansuki ya Yandi ya kutelama kuna, ya vwandaka kulumuka na kizizi ya Yandi.

¹⁵⁵ Yandi talaka munu mutindu *yayi*, mpe Yandi tubaka na munu, “Nge ke na kuvingila ministere ya nge ya malu-malu samu yawu siamisama na nge.” Yandi tubaka, “Mu me siamisa yawu dezia na nge. Ya me siamisama dezia. Nge fwana ndima yawu.” Beno me mona? Mpe mu telemaka kuna mpe vwandaka kuwa Yandi kaka muniti mosi. Mpe yawu kwisaka na mabanza ya munu. Mu kuwaka yawu ve, yawu kwisaka kaka na mabanza ya munu.

¹⁵⁶ Mutindu bakala yina me vwandaka nsumuki luzingu ya yandi ya muvimba, mpe yandi me zaba ti Biblia kele, yandi zaba ti Nzambi kele, kasi na mbala mosi yandi kuwa dilongi mosi, na manima Kima mosi kutuba na yandi, “ya kele nge.” Na manima, Ndinga yina mosi me vwanda kuna ntangu nionso, na yina ya me siamisama na yandi, na manima yandi ke tuba, “Mfumu, lemvočila munu.” Kasi ya ke sala mbote mosi ve tii kuna yandi ke ndima mpulusu ya yandi, na manima yandi ke kwenda mpe yandi kele Muklisto. Ata yinki mutindu yandi ke boka, yinki mutindi yandi ke lomba, yandi fwana kundima Yawu.

¹⁵⁷ Mpe Yandi tubaka na munu na ntangu yina, “Nge fwana ndima yawu mutindu mosi. Nge fwana kwikila yawu.”

¹⁵⁸ Mu ke na boma ya kukondwa kununga. Na nionso, mu ke na boma ti mu ke nata nsoni. Mu ke vwandaka ntangu nionso na boma ya yawu, mu ke tala, mu ke banza ti mu ke bokila kima ya luvunu. Samu, mu me kuzwa bukebi ya Biblia mutindu ba pesaka Moise ngolo ya nene, mpe yandi bulaka ditadi na kisika ya kutuba na yawu. Mu ke bambuka moyo na Elie, samu yandi vwandaka na dibandi, bana yina ya fioti vwandaka seka yandi samu yandi vwandaka na dibandi; mpe yandi singaka bana yina, mpe makumi yiya na zole ya bawu kufwaka na ba-ulusu, beno me mona. Mpe yina vwandaka Mpeve-Santu ve, kasi ya vwandaka profete yina, ya kudasuka. Mpe mu—mu me tubila nionso, samu na kukuma na yawu.

¹⁵⁹ Mpe Yandi telamaka kuna, ke tuba na munu. Mpe Yandi tubaka, “Kasi nge ke tambula na bantu mingi.” Yandi tubaka, “Kutambula na Munu, nge ke tambula nge mosi.”

¹⁶⁰ Mu monaka na ntangu yina, mu vwandaka pesa madia mingi na ba-denomination mpe nionso yina, beno me mona, muntu mosi mekaka na kutuba na beno yinki kusala mpe yinki kusala ve. Beno fwana landa Yandi. Ntangu yayi, beno bambuka moyo na vision yina Yandi pesaka munu samu na bambisi, beno

zaba, mpe wapi mutindu ti beno lendaka longa ve bidimbu ya mazulu na ba-bébé Pentecotiste. Beno bambuka moyo. Mpe ya vwandaka kuna. Mpe mu ke na nsongi ya Nsangu yayi ya malu-malu.

¹⁶¹ Na ntangu yina vision bikaka munu, mu tubaka, “Amen, Mfumu!” Mpe kento ya munu vwandaka ya kutelama kuna, zolaka kubwa ngambu. Mpe mu dumukaka na mbeto, mu lendaka tuba mbote mingi. Kana na seconde mosi, fièvre nionso bikaka munu.

¹⁶² Mu bokilaka Dokotolo Schoen, mu tubaka, “Mu ke zola ti nge tala munu.”

Yandi tubaka, “Yinki?”

¹⁶³ Mpe mu kwendaka kuna, mpe yandi talaka munu, yandi talaka na kati ya ba-sinus, yandi tubaka, “Tuba na munu yinki me salama, Mpangi Branham.”

Mpe mu tubaka, “Nge ke kwikila na disolo ya munu?”

Yandi tubaka, “Wapi mutindu mu lendaka tula ntembe na yawu? Ya me salama.”

¹⁶⁴ Yawu yina, beno me mona. Yawu yina, nkundi ya munu. Nzambi zaba wapi mutindu kusimba nge na zulu ya mbombi. Yandi zaba wapi mutindu kusala kima mosi samu na nge ti Yandi lendaka nata Nsangu na sika ya nge, beno me mona, kunata nge na kusala kima mosi.

¹⁶⁵ Bubu yayi, mu zaba ve mbala yikwa mu me nunga ve. Mu kwendaka kuna ntama mingi ve, mu vwandaka kulanda manaka ya radio. Mpe ya vwandaka na longi mosi yina vwandaka longa na zulu ya mvumbukulu, kubanda na ba-Corinthien ya Ntete kapu 15. Mpe yandi vwandaka longa mvumbukulu. Mpe yandi telamaka na kati-kati ya dilongi, mpe yandi tubaka, “Beno zaba, bantu mingi ke vwandaka na boma ya kukondwa kununga.” Yandi tubaka, “Ntangu Général Patton zimbisaka nkonga ya basoda,” yandi tubaka, “na yina ba tubaka na yandi. . . Yandi fidisaka samu ba sosila yandi bayankaka, mpe ba fidisaka yandi bayankaka. Yandi kufwaka bawu, mpe yandi fidisaka bayankaka. Mpe ntangu yandi kuzwaka nkonga ya tatu kuna,” yandi tubaka, “ntangu nionso disasi vwandaka bula, ba vwandaka kima mbangu na nsi ya kinzanza mosi, to ba vwandaka kima mbangu na nsi ya kima yankaka.”

¹⁶⁶ Yandi tubaka, “Beno tinda munu babakala, bana ve.” Yandi tubaka, “Mu ke zola babakala yina me kubama na kufwa. Mu ke zola ve muntu yina kele na boma ya lufwa. Kana diambu beto ke na kunwanina kele ya mbote ve na kufwa samu na yawu, na yina beno nata bawu ntama ya munu. Mu ke zola babakala.”

Bawu tubaka, “kasi nge me kondwa bitumba zole to tatu.”

¹⁶⁷ Yandi tubaka, “Mu me kondwa ve mvita. Mu me kondwa bitumba.” Kima mosi tubaka na kati ya ntima ya munu.

¹⁶⁸ Mu ke bambuka moyo na Eisenhower yina tubaka, “Ntangu mu bulaka disasi, tumaka mpe ba losaka obus na munduki ya tiya, bawu lendaka na kusala yawu mpe ya vwandaka ndandani ya masasi, yawu salaka ve,” yandi tubaka, “Mu bikaka ve mpe lembaka ve. Mu losaka disasi na nganda mpe mu kotisaka yankaka, mu mekaka yawu. Kana ya salaka ve, mu kotisaka yankaka, tii kuna mosi salaka.”

¹⁶⁹ Ya ke mutindu yina ya fwana salama. Mu zaba ve wapi mutindu ya ke vwanda. Kasi Nzambi kele Zuzi ya munu na zulu ya chaire, mu zaba ve masasi yikwa mpe bitumba yikwa—yikwa mu ke kondwa, kasi mu ke kondwa mvita ve. Yandi tubaka na munu ti Yandi ke vwanda na munu. Mu ke vingila tii kuna mu ke mona ti ministere me siamisama mpe mu ke mona yawu na kisalu. Mu ke banda na suka yayi, na lemvo ya Nzambi. Mu zaba ve kana ya ke sala awa, kana ya ke sala kisika yankaka, wapi mutindu ya ke sala to yinki ke salama. Kasi mu ke kwenda kaka na bandonga ya bisambu, samu na kusambila samu na bambevo, tii kuna mu ke zaba yina ke salama. Mu me mona yawu kusalama mbala zole to tatu.

¹⁷⁰ Mu me mona yawu kusalama na yinzo ya Hattie. Bantu yikwa me kuwaka disolo ya bampadi, mpe samu na mwana-kento, kento yina ya fioti? Muntu ya ntete na kati ya bantu nionso kubanda beto me zaba, kubanda na bilumbu ya bilandi, yina ba me pesaka ntete ve ntangu ya mbote ya kutuba, “Lomba yina nge me zola,” ntangu nge kele awa. Beno me kuwaka disolo yango? Beno me monaka kento yango? Bantu yikwa me monaka yandi ata fioti ve, mpe zola ti, yina zola kumona kento yango na zulu ya yina yawu me salama? Beto . . .

Hattie, nge lendaka kutelama? Yandi yina mama yango.

¹⁷¹ Ya vwandaka na kati ya yinzo. Na manima mu monaka bampadi nana, yina vwandaka ya kieleka kisika mosi ve kuna, mpe, tuba kaka ndinga, mpe ba ke vwanda kuna. Ya kieleka. Ya kele, bawu yina kuna. Mpe mu tubaka, “Yinki me sala ti bampadi yina kukwisa kuna?” ya kuvwanda na mesa ya yandi. Mpe mama ya yandi, Mpangi-kento Wright, Mpangi Wright kele awa, yandi vwandaka ya kuvwanda kuna. Bantu yikwa vwandaka na mesa, bantu yikwa kele awa na suka yayi? Beno telemisa maboko ya beno. Mbote, bawu yina kuna, bisika nionso na kivinga. Beno me mona? Mbote mingi, bawu yina kuna. Mpe mu tubaka, “Kilumbu mosi . . .” Mpangi ya yandi ya kento ya kikata vwandaka ya kuvwanda kuna.

¹⁷² Mu tubaka, “Yawu fwana kwisa na nzila ya vision, mpe nionso yina, kasi kilumbu mosi ya ke vwanda mutindu yankaka.” Mu vwandaka tuba mutindu yayi. Na mbala mosi, Kima mosi pakulaka ti (bika yawu na bantu yayi), mu me vwandaka ata fioti ve na kupakulama ya mutindu yina. Samu na yinki? Samu Hattie tubaka kima ya mbote.

173 Mu tubaka, “Wapi kisika bampadi yayi me katuka? Ya vwandaka ata na mosi ve kuna, ya vwandaka mpe kisika ya bawu ve, ya vwandaka kaka mutindu na dikunzu yina ya allo-allo kuna. Mpe mu monaka yawu kusalama kieleka bambala nana.” Mpe mu tubaka, “Mu zaba ve kisika yawu me katuka.” Mu tubaka, “Kima mosi kaka mu zaba, ti Nzambi mekaka na kusiamisa Nsangu na Abraham na ntangu mosi, mpe Yandi bokilaka na luzingu dimeme ya bakala, samu Yandi vwandaka na nsatu ya dimeme ya bakala, samu na kusiamisa Yawu. Ya fwana vwanda ti mu vwandaka na nsatu ya mpadi mosi, samu na kubokila ya munu. Mpe Yandi salaka yawu bambala nana, to bambala sambwadi, mu zola tuba, bambala sambwadi.” Mpe mu tubaka . . .

174 Mpe, Hattie, ntangu yankaka ya vwandaka zaba ve yina kento yango vwandaka tuba. Beno tala mutindu Yawu me luta mwama mpe muntu ya lunangu. Beno tala mutindu Yawu luta bima nionso, mpe me kwisa na mwa kento ya mputu ya yinsi kuna.

175 Mpe mu vwandaka na ba-dollars makumi zole na pokosi ya munu, samu na kuvutudila kento yango, ti, yandi silaka ba-dollars makumi tanu samu na lutungu ya yinzo-Nzambi yayi ya malu-malu. Mpe mu me tuba yawu ve samu na vwalangisa yandi; yandi lendaka ve kupesa bapalata makumi tanu. Kasi, ntima ya yandi na Nsangu, yandi vwandaka na nsatu ya yawu. Mpangi Neville, mu ke kwikila, ndimaka yawu, zolaka kuzwa ve ndambu ya yawu, yandi bikaka yandi kupesa kaka ba-dollars makumi zole ya yawu. Mpe mu vwandaka na ba-billets zole ya ba-dollars kumi na pokosi ya munu, Meda pesaka munu samu na ba-course, mpe mu tubaka, “Mu ke vutudila yandi yawu bubu yayi.”

176 Na yina mu banzaka, Kima mosi tubaka na munu, tubaka, “Yesu monaka mufwidi ya kento yina tulaka mwa ba-centime ya yandi tatu, mpe Yandi vutudilaka yandi yawu ve.” Yandi bikaka yandi kwenda na ntwala samu Yandi vwandaka kima ya nene mingi kuna na nzila.

177 Mu zabaka ve ti Yandi vwandaka tuba na munu mutindu mosi, samu na mufwidi yina ya kento, ya bakala ve. Ba fwaka bakala ya yandi. To mu zabaka ve ti yina vwandaka mutindu Mosi, ntangu mu tubaka, “Na yina mu ke bumba ba-dollars makumi zole, Nge ke na kima yankaka samu na yandi.”

178 Mu tubaka, “Kima mosi kaka mu zaba, ti Yehowa kele kaka Yehowa-Yile. Yandi kele na kiyeka ya kupesa munkayulu.”

179 Mpe Hattie, na kuzabaka ve yina yandi vwandaka tuba, yandi telamaka mpe yandi tubaka, “Ya ke kima mosi ve kasi ya kieleka, Mpangi Branham.” Oh, la la! Yina vwandaka kima ya mbote ya kutuba. Yina vwandaka kima ya mbote ya kutuba.

180 Kaka na ntangu yina, Ngolo ya Nzambi bulaka kisika yina; mu me vwandaka ata fioti ve na kupakulama ya mutindu yina.

Ntangu Yawu salamaka, mu tubaka, “Hattie, MUTINDU ME TUBA MFUMU, lomba yina nge me zola! Mu ke kipe ve yina yawu kele, Nzambi me pesa munu kiyeka ya kupesa nge nsatu ya ntima ya nge kaka na ntangu yayi. Kana nge lomba mafuku ya ba-dollars, nge lenda kuzwa yawu. Lomba ti mwana-kento yina ya fioti ya kikata kutelama mpe yandi kutambula, yandi ke kuzwa yawu. Lomba konso kima yankaka.”

Yandi tubaka, “Yinki mu ke lomba, Mpangi Branham?”

¹⁸¹ Mu tubaka, “Konso kima yina nge me zola. MUTINDU ME TUBA MFUMU.” Oh, yinki nsatu yayi!

¹⁸² Yandi talaka na nziunga. Tata ya yandi ya kiboba ya bansuki ya mpembe vwandaka kuna yina vutukaka na luzingu, kaka. Mama ya yandi ya kiboba vwandaka kuna, ya kubela. Mpangi ya yandi ya kento ya leki ya kikata, vwandaka kuna.

¹⁸³ Kasi yandi soolaka kaka yina vwandaka mbote. Yandi vwandaka na matoko zole ya babakala kaka na mvula yina ya kukondwa kukipe mambu. Baka ya yandi ya ntalu me vwanda na Nkembo; yandi vwandaka Muklisto, ke vingila. Kasi bana-babakala vwandaka Baklisto ve. Yandi tubaka, “Mioyo ya bana ya munu zole ya babakala.” Nzambi sakumuna ntima ya yandi.

¹⁸⁴ Mu tubaka, “MUTINDU ME TUBA MFUMU, baka bawu.”

¹⁸⁵ Mpe bawu yayi awa, me botama na Lukwikilu. Ba vwandaka tuba na munu na nkokila yina, ata mpe, mwana yina ya fioti ya bakala vwandaka sukula makulu kuna, yandi tetikaka maboko ya yandi na zulu ya yintu ya Mpangi Neville, mpe ya vwandaka sambila samu na yandi na ntangu yandi vwandaka sukula makulu.

¹⁸⁶ Bana-bakala ya fioti kele kieleka ya kuvwanda awa na lukutakanu kisika mosi kuna na suka yayi. Hattie, ba kele, ba kele awa na nge? [Mpangi-kento Hattie me tuba, “Ba kele kuna na manima.”—Mu.] Na manima, na manima. Wapi beno kele, bana? Beno telemisa maboko ya beno. Wapi kele bana zole ya babakala? Bawu yina kuna, ya kutelama kuna na manima. Nzambi sakumuna beno. Mbote mingi. Bawu yina kuna.

¹⁸⁷ Ntangu yayi, yinki salamaka? Kima yina mosi, nionso yina, ya zolaka salama . . . yina ya zolaka lomba, yandi lendaka kuzwa yawu. Yandi lendaka kuzwa yawu.

¹⁸⁸ Ntangu yayi mu ke zola kumona yawu salama. Ya ke vwanda dibanza ya bantu na ntuala ya Nsangu. Beno me mona mutindu yandi tubaka yawu? Yandi tubaka kaka kima ya mbote. Ya ke yina beno ke tuba, yawu yina ke sala yawu. Yina beno ke tuba!

¹⁸⁹ Beno tala kento yina ya Syrophénicienne ntangu yandi kwisaka na Yesu. Yandi tubaka, “Mfumumu, mwana ya munu ya kento me yangama na mpeve ya yimbi. Nge Mwana ya David, kwisa belusa yandi.”

190 Yandi tubaka, “Ya ke mbote ve samu na Munu na kubaka dimpa ya bana mpe kupesa yawu na bayimbwa.”

191 Fiou! Yinki zolaka salama kana Yandi zolaka tuba yawu na bayankaka na kati ya beto? Beto zolaka tuba, “Ya me bokila munu yimbwa? Huh, ya ke na kima mosi ve na Yandi, na mutindu nionso! Dibuundu ya nene kele ya kusungama. Yandi ke kima mosi ve kasi exalté. Yandi kele kima mosi ve kasi Beelzébül.” Beto zolaka vwanda na dibanza yina. Kasi yandi ve.

192 Yandi tubaka, “Ya ke kieleka, Mfumu. Nge ke kieleka ya kusungama. Kasi bayimbwa ke zola kudia bitini ya mampa na nsi ya mesa ya bana.”

193 Yina simbaka Yandi. Yandi tubaka, “Samu na nzonzolo yayi, mpeve ya yimbi me bika mwana ya nge ya kento. Samu na nzonzolo yayi!”

194 Ya ke dibanza, bankundi. Yandi tubaka yawu ve? Beno fwana kwikila yawu, bankundi. Beno, beno kwikila munu ve, mu kele muntu; kasi beno kwikila yina mu ke na kutuba na beno, beno kwikila Nsangu. Kana beno kwikila munati nsangu ve, beno kwikila Nsangu. Kana bakala mosi me kota na kivinga kuna, na télégramme, ya vwanda nani, yina bakala yango lendaka vwanda to nani yandi vwandaka, nene to fioti, beno ke kwikila yina kele na télégramme, na muntu ve. Nzambi me fidisa munu na kutuba na beno. Mu ke na Nsangu. Nzambi me fidisa munu na kutuba na beno ti Yandi me vumbuka na lufwa, ti Yandi kele awa na suka yayi. Yandi me siamisa yawu na bidimbu mpe mambu ya ngitukulu, ti Yandi kele awa, mpe beno nionso lenda beluka na bimbevo ya beno kana beno ke baka kaka dibanza ya mbote mutindu beno ke kwisa. Beno ke sala yawu, na ntangu beto ke yimba *Kwikila Kaka*.

195 Ntangu yayi bika ti bayina ba ke sambidila, beno kwisa awa mpe beno vwanda na ndonga na lweka awa. Ntangu yayi, beno kwisa ve kana beno ke kwikila ve na ntima ya beno nionso.

196 Mfumu ya ntalu, ngunga yawu yayi. Mu ke sambila ti Nge ke belusa bantu yayi, Mfumu. Mpe santisa mafuta yayi. Baka nkemo samu na Nge mosi, Tata. Beto ke fidisa yayi na Nkumbu ya Yesu Klisto. Amen.

197 Mu ke kukiyufula kana beto lendaka lomba ti bantu yina kele ya kutelama na lweka *yayi* awa, kana ya ke na mutindu ba lendaka kuzwa mwa kivinga ya fioti awa, na yina beto lenda nata bantu na lweka, kana beno lenda. Kana na kati awa, beno basika mutindu *yayi*. Na manima bawu nionso lendaka kwisa mutindu yayi, kuna na ndonga, samu na kusala ndonga mosi na kusikaka mutindu yayi.

198 Kima mosi fwana salama, Mpangi Neville. [Mpangi Neville me tuba, “Amen. Ya ke na kusalama ntangu yayi. Lukumu na Mfumu! Yesu kele awa. Yinga. Bawu nionso me beluka na Ngolo ya Nzambi.”—Mu.] Amen.

199 (Yinki nge me tuba? Mbote...Mbote, ve, kaka na ntwala. Mpangi Neville na munu, yinga, beto ke sambila samu na bawu na nsuka. Na yawu, ba lendaka ve kunata bawu mutindu yayi, samu beno ke, kana beno zola, beno ke...Na mwa minuti...?....)

200 Ntangu yayi beno bika mu tuba na bantu yina ke na kuvingila: *Yayi* kele Ndinga ya Nzambi, Nani mu... Na yina mu ke zinga, mpe mu ke kufwa na yawu, na lemvo ya Nzambi mpe lusalusu. Nzambi kele Zuzi ya munu ya kieleka, mu me tuba na beno Kieleka. Mu me mona, mpe bima yayi nionso ke na kukwisa na yawu. Ata mpe na mwa mbisi yina vumbukaka na lufwa kuna, beno me kuwaka disolo yina? Ya ke na babakala kele ya kuvwanda kuna na manima, bawu nionso, ba vwandaka kuna ntangu ya salamaka; ya tubamaka kilumbu na ntwala yawu salama. Ntangu yayi, wapi mutindu mu lendaka tuba na beno bima yayi yina kele? Beno me mona, mu ke zola kulonga na zulu ya yawu, mosi ya bankokila yayi, na zulu *Ngolo Ya Nsikamanu*. Muntu lendaka tuba na beno kima mosi, mpe kulandila kaka na kutunga mutindu yina, kasi kana ya ke na Masonuku ve samu na kusimbisa yawu, nsuka-nsuka ya ke kubwa. Kana kuswasikisa mabanza yayi, mpe ba-vision yayi mpe bima yina mu me tuba na beno, kana ya vwandaka ya Kieleka ve; kima ya ntete, ya ke na Biblia samu na kusungika yawu, mpe ya vwandaka na Mpeve-Santu samu na kusiamisa ti mu me tuba Kieleka.

201 Ntangu yayi, mu me vwanda na kilanga ya kulonga bamvula pene ya kumi na yiya, na ya masawula nionso yina lendaka vwanda na ntwala ya munu. Bantu ya kulonguka, bantu ya mayele, bima yankaka nionso, ata na ntangu mosi ve ba lendaka...

202 Na manima beno me zaba yina ba tubaka? Beno me kuwa yawu awa. Ba tubaka, “Bantu na meso ya bantu nionso ke baluka, samu na kutuba na bantu.” Ntete ba tubaka ti ya vwandaka bantu ya dibuundu ya munu, yina ke mata kuna na zulu samu na kusala yawu. Na manima bawu lendaka simba yawu ve, ya ke na mingi ya bawu.

203 Kima ya kulanda ba tubaka, ti, “Ya ke vwanda mutindu mpangi me tuba” yina ke kwenda na munu, “ba ke telama na manima kuna mpe ke tuba, ‘Muntu *yayi* me kuwa, na makutu ya yandi.’”

204 Na yina ba tubaka ti, “Billy Paul, Billy Paul ke kwisa mpe—mpe ke mata kuna mpe ke tanga kalati, yina bantu ke tuba. Kana ya ke vwanda na kima ke tambula mbote ve na makutu ya bawu, yandi ke tuba, ‘makutu ya bawu’ to ‘estomac ya bawu.’”

205 Wapi mutindu na yinza ba lendaka vwanda kuna kukondwa bakalati ya bisambu? Wapi mutindu na yinza ya lendaka zabisa mambu na ntwala yina ke salama na mutindu ya kulunga? Wapi

mutindu ya lendaka salama mutindu yina? Ya lendaka salama ve. Bantu nionso me zaba yawu, bayina ke na mabanza ya mbote.

206 Ba tubaka mutindu mosi samu na Yesu, ntangu Philippe kwendaka baka Nathanaël. “Yandi vwandaka nkundi ya Yesu.” Yandi tubaka, “Ya kieleka, yandi tubaka na Yesu nionso yina. Yandi kwendaka sosa yandi.”

207 Na manima bilandi tubaka, to bilandi ya dibuundu ya nene tubaka, “Muntu yayi kele Beelzébul. Yandi kele Beelzébul. Yandi kele ngangana-kisi.”

208 Yesu tubaka, “Mu ke lemvokila beno. Kasi kilumbu mosi Mpeve-Santu ke kwisa sala diambu ya mutindu mosi, ndinga mosi samu na kutelmina Yawu ya ke lemvokila beno ata fioti ve.” Ntangu yayi kana . . .

209 Mu ke vwandaka ya kusungama na beno bantu, ya kusungama kaka mutindu mu lendaka vwanda. Oh, mu me teleminaka mwa bakundima yina beno ke na yawu na mwa théologie mpe bima. Kasi, mu ke salaka yawu samu ti, Paul tubaka, “Kana wanzio me katuka na Zulu samu na kulonga kima yankaka ya luswaswanu na yina Biblia me tuba,” mpe yandi longaka, “bika yandi vwanda ya kusingama.”

210 Na yawu, mu fwana landa kaka yina Biblia me tuba. Kana Biblia me tuba, “Yandi kele mutindu mosi mazono mpe kukonda nsuka,” mu ke kwikila yawu. Nionso yina Biblia me tuba, yawu kaka mu ke kwikila. Mu ke tuba yawu kaka mutindu yina. Mu me longukaka ve, mu me kuzwaka formation mosi ve. Mu kuwaka kaka Mpeve-Santu mpe Biblia. Mpe ntama kuna, na suka Paki yayi, na bamvula makumi tatu na mosi, Yandi me bakaka nsoni ata fioti ve.

211 Mpe mu ke tuba na beno ti Mpeve-Santu tubaka na munu samu na ministere yina ke kwisa, bamvula zola to tatu me luta, mpe mu vwandaka tuba na mabuundu bisika nionso. Mpe Nzambi ya Ngolo nionso kele Zuzi ya munu, kaka awa na lweka yayi ya Salem, bampadi yina basikaka kisika yina ya vwandaka ve na bampadi. Beto vwandaka kuna na Charlie, yina ke ya kutelama kuna na manima, mpe mingi na kati ya beno awa na Kentucky; bampadi yina basikaka bisika yina ba vwandaka ve, mu tubaka kisika ya ke vwanda. Kisika Tony na bayankaka, Banks, yina me vwanda kuna. Mpe ya vwandaka kuna, ya kieleka. Beno vutuka mbala mosi na manima, mpe muntu ya ntete ba zabisaka yawu, vwandaka kento yina kele ya kuvwanda kuna, mpe ya kele kuna. Na suka yina kuna, ntangu mu vwandaka ya kubela na mpasi ya laka, mu monaka Yesu me telama na ntwala ya munu, mpe Yandi tubaka na munu ti ministere me siamisama dezia na munu.

212 Ntangu yayi yinki ke salama, mu me zaba ve. Kasi, kima mosi, mu fwana tula na lweka yina yankaka, samu na kubasika na yayi. Mutindu mosi kaka mu zaba kusala. Ya zabana ntangu

yayi. Bika yayi kusonama na mabanza, mutindu Job tubaka na suka yayi, na kilapi ya kisengo, na zulu ya ditadi. Mu zaba ve yinki kusala. Kima mosi kaka mu zaba, kele kukwenda na ntwala. Yandi me tuba na munu. Mpe Nzambi kele Zuzi ya munu, Yandi tubaka na munu. Mu me tuba na beno Kieleka. Mpe kana Nzambi me siamisa mpe tuba na beno, mpe ata na ntangu mosi ve muntu mosi awa me tombolaka diboko ya bawu samu na kima yina vwandaka ya luvunu, na yina yayi kele kieleka, diaka. Ya kele kieleka, diaka.

²¹³ Ntangu yayi na yina mu ke kwenda awa mpe mu ke telama na nsuka ya ndonga. Mu ke kuyamba kuluntu, Mpangi Neville kuna, muntu ya busantu, pasteur ya beto awa, samu na kupakula bantu. Mu ke tetika maboko na zulu ya bantu, samu lutumu ya Yesu, na manima ya Paki, vwandaka, “Benoni kwenda tetika maboko na zulu ya bambevo, ba ke beluka.”

²¹⁴ Mu zaba ve yina Yandi ke tuba na munu na nzila. Mu ke meka na kuvwanda na nsatu samu na kupakulama yina ya zulu. Mu me zaba ve yina ke salama. Mu me zaba ve. Nionso yina ya kele, mu ke sala kaka mutindu Yandi ke tuba na munu.

²¹⁵ Ntangu yayi beno kwisa, beno kwisa na ntima ya kufuluka. Ata ti Yandi me nganina beno, ata ti Yandi me tuba kima mosi ve samu na beno, kukondwa kutala yina ya kele, beno kwenda na kutondaka Yandi, beno me mona. Samu, kusalu me salama, ya ke mutindu ya kukuma na beno.

²¹⁶ Ntangu yayi, mpangi-bakala, na dikulu yina, mu ke zola ti nge kwikila yawu. Kana Yandi, na nzila ya allo-allo, lendaka katula na beno bampasi yina ya estomac, Yandi lendaka ya kieleka kukatula na beno mpasi yina ya dikulu na suka yayi, beno me mona. Ntangu yayi beno kwikila na ntima ya beno ya muvimba.

²¹⁷ Mpe mama yina na mwa bébé yina vwandaka na mpasi ya ntima, kutula diaka ntembe ve. Kwikila! Kwikila!

²¹⁸ Ntangu yayi mu ke zola ti bantu nionso na kati ya yinzo-Nzambi kuvwanda na bisambu. Mpe mu ke kulumuka kuna samu na kusambila. Benoni nionso kuvwanda na bisambu ntangu yayi, na yina mu ke natisa ndonga yayi ya kisambu, samu na kulomba, samu na kutetika kaka maboko ya munu kuna mpe kutuba lusakumunu.

²¹⁹ Mpe, beno bambuka moyo, kana mosi na kati ya beno ke na disumu ya kukondwa kufungula, bika beno zaba ti Nzambi ke belusa beno ata fioti ve na disumu yina ya kukondwa kufungula. Benoni sungika yawu, na ntwala beno kwisa awa, samu ya lendaka sala ti beno kukuma ya kulutila yimbi. Benoni me mona?

²²⁰ Ntangu yayi ya ke na kuswasikisa mabanza ve. Kuswasikisa mabanza, mu ke zaba mambu na kati ya bawu. Kasi, mpe yayi ke kuswasikisa mabanza ve, mu ke na kusosa ministere ya malu-

malu. Beno nionso me bakula mbote? Mbote mingi. Ntangu yayi beno kwikila.

Ntangu yayi beto sambila na yina beto ke kulumusa bayintu ya beto.

²²¹ Tata Nzambi, bitambi ya munu kele kaka na zulu ya chaire yayi, kubanda bangunga na manima ya bangunga, ya me lunga ntangu yayi pene ya bamvula makumi tatu to kulutila, yina mu me telama awa na kulongaka, mpe na yinza ya muvimba. Mpe Nge me siamisa Nsangu ya mbote yina mu me longa, samu Nsangu me katuka na Nge. Mu me kwendaka ata fioti ve na lukolo mosi, mu me yufulaka ata fioti ve muntu mosi kasi Nge, na kutangaka Ndinga ya Nge mpe na kuingilaka na kumona yina Mpeve ke tuba na kusala.

²²² Mpe ntangu yayi, Mfumu, Nge me zaba ministere yayi ya Marc 11:23, mpe na kuzabaka ti ngunga me lunga, na kuzabaka ti mu me tubila na mutindu ya kukwikama bampadi yina, mpe samu na Mpangi-kento Hattie mpe bana-babakala. Ntangu yayi, Tata, mpe na kuzabaka ti vision yina kwisaka na munu kwisaka na munu kuna na mbeto, na suka yina. Mu monaka Biblia yina, na manima kulunsi, na manima Nge. Mpe ya me monisama pwelele na mabanza ya munu ti mu fwana kundima yawu, samu ya me siamisama.

²²³ Ntangu yayi, Mfumu, mu ke kwenda na ntwala na suka yayi na kati ya yinzo-Nzambi ya munu, samu na kutelama awa na suka yayi ya Paki, na kusambilaka ti Nge ke telemisa munu na dikabu mosi ya malu-malu, ya kulutila ngolo, samu na zola ya bantu, ya kulutila ngolo. Ya ke samu na mpulusu ya munu ve; samu Nge me vulusa munu, dezia, Mfumu. Samu na munu mosi ve; mu me losa bima ya nene nionso, samu na kuzaba Nge. Mutindu Nge tubaka na munu kuna na tempelo yina ya nene, kilumbu yina, “Mu ke kitini ya nge.” Ntangu yayi, Mfumu, bika mu vwanda kitini ya Nge, na yawu mu lendaka kuzwa lemvo na Nge, ti Mpeve ya Nge ke kota na kati ya munu. Mpe ntangu mu ke tetika maboko ya munu na zulu ya bantu yayi ya ntalu, yina kele na mpasi, bika Mpeve ya Nge, Mfumu, kusala kisalu yina me bikala. Yawu yina nionso mu me zaba na kusala, Mfumu.

²²⁴ Mu ke bambuka moyo na lutumu ya munu, mu me “Butuka samu na kusambila samu na bambevo. Nata bawu na kukwikila, mpe vwanda ya kusungama ntangu nge ke sambila.” Mfumu, mu ke kaka . . . Mu me zaba ve wapi mutindu kukuma ya kusungama mingi. Mu—mu . . . Ba ke na kumona mpasi, Mfumu. Mpe mu—mu me mona mpasi, munu mosi. Pardo, Nzambi ya Luzolo, sala ti bawu kubeluka, bawu nionso.

²²⁵ Mu ke kwenda na ntwala ntangu yayi, Mfumu, na nzila ya lukwikilu, mutindu Moise kwendaka zabukaka Nzadi Mbwaki. Mu me basika na chaire yayi, mu ke kulumuka na ndonga yayi ya bisambu, na Nkumbu ya Yesu Klisto. Bika Nzambi Yina pesaka

munu bampadi yina, Nzambi Yina pesaka Mpangi-kento Hattie bandinga yina, Nzambi Yina me tuba na bawu, bika ti Yandi kwenda na munu. Mu ke kwenda na Nkumbu ya Yesu Klisto. [Mpangi Branham me katuka na micro samu na kusambila samu na bambevo, bandinga mingi ya yandi ke wakana mbote ve—Mu.]

226 Satana, mu ke fundisa . . . nge, na Nkumbu ya Yesu Klisto, na kubika bébé yayi. Bika yandi, basika na mwana yayi; kwenda, mpe bébé kubeluka.

227 Mu ke tetika maboko ya munu na zulu ya mpangi ya munu ya bakala, na Nkumbu ya Yesu Klisto, mpe mu ke fundisa bampasi ya nzutu ya yandi. Amen.

Na Nkumbu ya Yesu Klisto, pesa yandi lombilu ya yandi.

228 Mfumu, na Nkumbu ya Yesu Klisto, pesa Mpangi-kento Ruth kubeluka ya nzutu ya yandi. Amen.

229 Mu ke sambila samu na bébé. Kasi mu—mu ke kulumuka na chaire yayi . . . Wapi sika nge ke zingaka? [Mpangi-kento me tuba, “Bloomington.”—Mu.] Bloomington, Indiana? Nge ke sonika na munu mukanda samu na bébé yayi. Ya me vimba na kati ya estomac awa ntangu yayi. Nge ke kwikila, mama, ti ya kele kieleka? [“Mu ke kwikila ya kele kieleka.”]

230 Na yina, Tata, mu ke tetika maboko ya munu na zulu . . . bébé yayi, mpe mu ke fundisa mpeve yayi ya yimbi. Kwenda ntama na bébé yayi. Mpe bika . . . ? . . . Bika yandi vwanda mbote ntangu yayi mpe bébé kubeluka.

Nge ke sonika na munu mukanda, na mwa bilumbu.

231 Beno me mona meso yina kele na lweka ya bébé yina me vwanda kuna? Kana beno tula ntembe diaka ve, beno ke vutula bébé *yina* mpe kutalisa yandi ti ya me kuma mbote mpe yandi me beluka.

232 Mu ke tetika maboko na zulu ya mpangi-kento yayi. Mpe bika yandi kuvwanda na dibanza ya kento ya Syroohénicienne. Mpe bika yandi kubeluka na Nkumbu ya Yesu Klisto . . . ? . . .

Bika ti ntima kubeluka, na Nkumbu ya Yesu Klisto.

233 Mu ke tuba bampova yayi. Ya fwana beluka. Ya lenda vwanda kima yankaka ve. Yesu me tuba, “Mu lenda, kana beno me kwikila.” Ntangu yayi, kana Yandi lenda basisa mpadi kaka mutindu *yina*, mutindu Yandi salaka dimeme ya bakala na ntangu mosi, Yandi lenda sala ti ntima kukuma mbote mpe kubeluka. Ya fwana salama.

Na Nkumbu ya Yesu Klisto, bika ntima kubeluka. Pesa yawu.

234 Ntangu yayi, ya ke mpasi ve? Ya ke mpasi ve. Nzambi kele ya kieleka kukondwa mpasi, beto ke kima mbangu na zulu ya yawu.

Ntangu yayi beno vwanda kaka kukondwa mpasi beno banza na yawu diaka ve. Ya ke beluka.

235 Mfumu, bika mpangi ya beto ya kento kubeluka, na Nkumbu ya Yesu Klisto. Amen. Mpangi-kento . . . ? . . .

236 Mfumu, ntangu yayi mu me tuba bampova yayi, na bukieleka mutindu mu lendaka tuba na ntwala ya bantu. Mu me tuba na bawu, “Kana beno tuba na mongo yayi, ‘Katuka awa,’ mpe beno tula ntembe ve, beno lenda kuzwa yina beno me tuba.” Na Nkumbu ya Yesu Klisto, bika mpasi yayi kukatuka, mpe bampasi ya nge nionso yina nge na yawu. Kutula ntembe ve ntangu yayi. Kwenda pene-pene ya Yandi ntangu yayi.

237 Mfumu, mu ke tetika maboko ya munu na zulu ya mwana yayi ya fioti na mpasi ya ngolo ya yintu. Na Nkumbu ya Yesu Klisto, bika yandi beluka. Amen.

238 Mfumu, na Nkumbu ya Yesu Klisto, bika mongo yina kukatuka na yandi, bika yandi beluka. Bika mpangi ya beto ya bakala ntangu yayi kuvwanda . . . ? . . . Amen.

239 Kifwa-makutu mpe baba; kifwa-makutu mpe baba. Mfumu, na Nkumbu ya Yesu Klisto! Mu me telama mpe mu me longa kilumbu na manima ya kilumbu, mpe mvula na manima ya mvula, mu me monaka ata fioti ve lukwikilu kukutana na Nge, na luzingu ya muvimba, ti kima mosi kusalama ve! Ntangu yayi, yandi kele kifwa-makutu na dikutu ya yandi, mpe ya ke na bamputa na estomac. Bika yandi beluka, na Nkumbu ya Yesu Klisto. Amen.

Ntangu yayi, beno tula ntembe ve.

240 Mfumu, Nge zaba bampasi ya nzutu yayi. Na maboko ya munu na zulu ya yandi, na ntima ya kusungama, bika yandi kubeluka, na Nkumbu ya Yesu Klisto. Amen.

241 Lufwa kele na kielo mosi, lukwikilu na yina yankaka. Nzambi, balula ditadi mpe bika lukwikilu kubaka kisika. Bika cancer kubika yandi, na Nkumbu ya Yesu Klisto.

242 Mfumu, bika yandi beluka. Mu ke tetika maboko ya munu na zulu ya yandi. Nsangu ke na kubula kaka na bibaka. Na Nkumbu ya Yesu Klisto, bika yandi beluka.

243 Tata Nzambi, mu ke tetika maboko na zulu ya mpangi ya munu ya bakala. Bika ya salama, Mfumu, Mpeve ya Nge mpe ngolo, kupesa yandi lombilu ya yandi. Bika ya salama, na Nkumbu ya Yesu Klisto. Amen.

Ya me mana. Kutula ntembe na yawu ve.

244 Mfumu, nsatu ya mpangi ya beto ya bakala kele kukwisa na Ntwala ya Nge, na mpasi yayi na zulu ya yandi. Ntangu yayi, na Nkumbu ya Yesu Klisto, bika yandi kuzwa yina yandi ke na kulomba. Amen.

245 Yinki kima ya nene yayi! Bika Mpeve-Santu kukwisa na zulu ya mwana yayi, samu na nkembo ya Nzambi ti ba me nata yandi samu yandi. . . ? . . . Samu na zola ya Kimfumu ya Nzambi, bika yandi kuzwa yawu. Amen.

246 Tata, na Nkumbu ya Yesu Klisto, bika ya vwanda mutindu yina, ti mpangi ya beto ya kento kubeluka, mpe yandi kuzwa lombilu ya yandi, na Nkumbu ya Yesu. Amen.

247 Bika ya salama. Nge ke kuzwa Mpeve-santu. Ya ke mutindu ve ya kupekisa beno na. . . ? . . . Nge fwana kuzwa yawu! Beno fwana kuzwa Yawu, samu Nzambi me tuba mutindu yina. Beno kangama na Yawu.

Ya ke kaka kutobola mwa croûte yina kuna. Beno tuba kaka. . . ? . . .

248 Tata ya Mazulu, na Nkumbu ya Yesu Klisto, pesa lombilu ya mpangi-kento ya beto. Amen.

249 Tata, na Nkumbu ya Yesu Klisto, pesa lombilu ya mpangi ya beto ya kento. Bika yandi beluka. Amen.

250 Yandi lendaka basisa mpadi, bambala sambwadi. Yandi pesaka na kento yina nionso yina yandi lombaka; Yandi ke pesa yawu na nge. . . ? . . .

251 Mfumu, na Nkumbu ya Yesu Klisto, pesa lombilu ya mpangi ya beto ya kento. Ya kele Ndinga ya Nge. Matondo na Nge. Mpe bika ya pesama na yandi, Tata, na Yesu Klisto. Amen.

252 Bankundi ya nge ya luzolo? Tata, na Nkumbu ya Yesu Klisto, pesa yayi. . . ? . . .

253 Mfumu, kento yayi ya fioti ya Juif. . . Nge kele Nzambi ya Abraham. Pesa yandi, na Nkumbu ya Yesu Klisto, lombilu ya yandi. Ya vwanda mutindu yina!

254 Na Nkumbu ya Yesu Klisto, Nzambi ya Zulu, pesa lombilu ya yandi. Amen.

255 Mwana-kento yayi ya fioti. Kaka mutindu nge ke kwisa na estrade kuna, Nzambi me tuba na munu nionso samu na luzingu ya nge. Yandi ke katula kidi-kidi yina na nge.

256 Mfumu, mu ke fundisa kidi-kidi na kati ya mwana-kento yayi. Bika ya katuka na yandi na ngunga yayi mpe yandi basika awa na kiesa mingi. Ya ke salama, na Nkumbu ya Yesu Klisto.

257 Nzambi ya Zulu, Yina vumbulaka Mwana ya Nge, Yesu, na mvumbukulu beto ke kembisa, bika yandi kembisa yawu kulutila nene bubu yayi. . . ? . . . Na Nkumbu ya Yesu. Amen.

258 Na Nkumbu ya Yesu Klisto, Mwana ya Nzambi, mu ke tetika maboko na zulu ya mpangi ya munu ya kento, na kulombaka ti yandi kubeluka ntangu yayi na Nkumbu ya Yesu.

259 Na Nkumbu ya Mfumu Yesu Klisto, Mwana ya Nzambi, bika mpangi ya beto ya kento kubeluka. Amen. Ya lenda pekisa yandi ve. Ya fwana katuka. Kwenda, yayi fwana katuka.

260 Mfumu, na Nkumbu ya Yesu Klisto, bika mpangi ya beto ya kento kubeluka. Amen. Na Nkumbu ya Yesu Klisto, mu ke belusa yayi, mpangi ya munu ya kento. Amen.

Na Nkumbu ya Yesu Klisto, mu ke belusa mpangi ya munu ya kento. Amen.

Na Nkumbu ya Yesu Klisto, mu ke belusa mpangi ya munu ya kento.

Na Nkumbu ya Yesu Klisto, mu ke belusa yayi, mpangi ya munu ya kento.

Na Nkumbu ya Yesu Klisto, mu ke pesa yandi lombilu ya yandi. Amen.

261 Mfumu, na Nkumbu ya Yesu Klisto, mu ke pesa mama yayi ya fioti lombilu ya yandi.

Na Nkumbu ya Yesu Klisto, mu ke pesa yandi lombilu ya yandi, Mfumu.

Mfumu, na Nkumbu ya Yesu Klisto, mu ke pesa yandi lombilu ya yandi.

262 Satana, mu ke basisa nge. Na Nkumbu ya Yesu Klisto, bika kento yayi.

263 Nge vwandaka ya kukanga kubanda ntama. Nge me kuma na kimpwanza ntangu yayi. Nge ke beluka. Ya ke vwanda mbote mingi ntangu yayi, na yina. Kwikila yawu ntangu yayi.

264 Nzambi, na Nkumbu ya Yesu Klisto, mu ke pesa mpangi-kento yayi, yina kele kikata, kubeluka ya nzutu ya yandi. Amen.

265 Na Nkumbu ya Yesu Klisto, mu ke pesa mpangi-kento yayi kubeluka ya nzutu ya yandi. Amen.

266 Na Nkumbu ya Yesu Klisto, mpangi-kento, mu ke pesa nge kubeluka ya nzutu ya nge. Amen. Ya vwanda mutindu yina!

267 Mu ke tula kivuvu na Nzambi ti mu ke na kusala kifu ve. Pesa yayi, na nzila ya lukwikilu. Ya ke vwanda mutindu yina!

268 Nge ke kwikila ti Nzambi ke pesa nge ngolo ya kubelusa mpasi ya ntima mpe? Nge ke kwikila disolo yina mu me tuba? Na ntima ya nge ya muvimba? Na yina mu ke pesa nge kubeluka ya nge. Na Nkumbu ya Yesu Klisto, mu ke pesa nge kubeluka ya nzutu ya nge.

269 Yinki kele nkumbu ya kento yayi yina me vutuka na manima awa? Nge ke zingaka na nziunga awa kisika mosi kuna? [Mpangi-kento me tuba, “Yinga.”—Mu.] Beno bambuka moyo ti beno me beluka! Ya ke kaka ya kieleka mutindu mu me telama awa.

270 Tata na Nkumbu ya Yesu Klisto, pesa yayi, mu ke sambila, kubeluka ya nzutu ya yandi. Amen.

271 Tata, na Nkumbu ya Yesu Klisto, bika yandi kuzwa kubeluka ya nzutu ya yandi. Amen!

272 Mu—mu—mu ke tuba na beno. . . Mu—mu—mu. . . Na lemvo ya Nzambi, na nzila ya dikabu ya Kinzambi, mu ke pesa na beno kubeluka ya nzutu ya beno! Mu katula diaka, mpeve yina ya yimbi.

273 Nge ke kwikila Mpangi-kento Rose? O Mfumu, Kiyidiki ya zulu na ntoto, pesa Mpangi-kento Rose Austin kubeluka yayi ya nzutu, Mfumu, na Nkumbu ya Yesu Klisto. Amen. Yawu yina, Mpangi-kento Rose, kwenda na kukwikilaka ntangu yayi.

274 Mfumu, pesa mpangi ya beto ya kento kubeluka ya nzutu ya yandi, na Nkumbu ya Yesu Klisto. Amen. . . ? . . .

275 Nge ke kwikila yawu? Nge ke kwikila konso kitini ya yawu. Na yina mu ke pesa nge, na Nkumbu ya Yesu, lombilu ya nge. Nzambi ke belusa nge.

276 Bika ya vwanda mutindu yina, Mfumu, ti mpangi ya yandi ya bakala ke beluka, na nzutu mpe na kimpeve, na Nkumbu ya Yesu Klisto. Amen!

Bika yayi kuvwanda ngunga ti ntangu. . . ? . . .

277 Mfumu, mu ke tetika maboko ya munu na zulu ya yandi, ntangu yandi kele kieleka na kivuvu ve, na badokotolo to konso nkisi yina ya science ya lusansu ya nzutu. Kasi na kukutana ve na Klisto me vumbuka na lufwa. Na Nkumbu ya Yesu, bika yandi beluka. Amen.

. . . ? . . .

278 Mfumu, pesa na mpangi ya beto ya kento, na kuwaka na bukebi lombilu ya yandi, na kutalaka konso mpova yina ya me tuba. Ya ke samu na zola ya Kimfumu. Mu ke sambila ti Nge ke pesa yawu na yandi, na Nkumbu ya Yesu. Amen.

[Mpangi-kento ke na kutuba na Mpangi Branham—Mu.]
. . . ? . . .

279 Mfumu, mutindu kisadi ya Nge, widila kuboka ya mama yina samu na bébé ya yandi, mu ke fundisa diabulu yina me sala yayi.

280 Mpe na zulu ya kundima ya lukwikilu ya kento, mu ke katula diabulu yayi. Nge ke vwanda na kiyeka ve ya kubebisa nzutu ya mwana yayi. Beluka na Nkumbu ya Yesu. Amen.

Yandi beluka, mpangi-kento. Kaka kutula ntembe na yawu ve, ata fioti. Nzambi sakumuna nge, mpangi-bakala. Yayi ke bébé ya nge? Bika yandi kuzwa Mpeve-Santu!

281 Nge ke zola ve kunata bébé kisika mosi kuna mpe kuwa yandi kaka na mwa minuti fioti. Mu ke kwikila ti kima mosi me salama na bébé. Nge ke kuzwa yawu. Nge ke kwikila yawu?

282 Na Nkumbu ya Yesu Klisto bika mpangi ya beto ya bakala kuzwa kubeluka ya nzutu ya yandi.

283 Mfumu, bika Ngolo ya Nzambi ya Ngolo nionso kufundisa mpasi ya nzutu ya yandi, mpe fulusa yandi na Mpeve-Santu.

Ngunga mpe ntangu yawu yayi. Na Nkumbu ya Yesu Klisto, mu ke pesa Yawu na yandi. Amen.

284 Sukadi me kwenda. Nge me kuzwa Mpeve-Santu. Bantangu yikwa nge kele na mpasi. . . ? . . . Luzingu ya nge ya muvimba. Nge ke kwikila ti Klisto ke belusa nge mpe ke kukuula nge na mpasi yayi; belusa nge?

285 Mwana ya nge? Dikulu ya nge. Nge me kwisa kaka nge mosi? Kana mu vwandaka, kana—kana mu vwandaka na ngolo na kati ya munu, beno me mona! Kasi mu ke kwikila ti Nzambi ke sadisa munu na kuvwanda na lukwikilu samu na yawu. Mu ke sala nionso yina kele na ngolo ya munu. Nge ke kwikila na munu? Nge ke kwikila disolo yina me tala bampadi yina? Nge ke kwikila? Nge ke kwikila ti ya lenda salama, ti na suka yayi, ti Nzambi lendaka belusa nzutu ya nge, mpe nge tambula diaka, nge tambula mutindu nge vwandaka tambula na ntangu ya ntete? Ya ke na kima mosi salamaka na lubutuku ya nge kuna, ya ke na kima mosi yina kangaka fioti kima mosi mpe nge me kula mbote. Ya ke kaka mutindu divala mosi ke kula na zulu ya divala yankaka, ya ke simba yawu. Mbote, kana divala yina lendaka katuka na divala yina, ya ke sungama mpe ya ke vwanda mbote. Beno me mona? Ya kieleka? Ya ke nsingulu. Ya ke nsingulu. Kana nsingulu lendaka katuka, na yina beno ke beluka. Beno me mona?

286 Mfumu, mu ke na kubanza, yinki kana yayi vwandaka mwana ya munu, yinki kana yayi vwandaka mpangi ya munu ya bakala? Na lukwikilu, mu ke katula nsingulu, na Nkumbu ya Yesu Klisto. Amen.

287 Mfumu, mu ke tetika maboko ya munu na zulu ya yandi mpe mu ke lomba kubeluka ya yandi, na Nkumbu ya Yesu Klisto. Amen.

288 Tata Nzambi, na Nkumbu ya Yesu Klisto, mu ke tetika maboko na zulu ya kento yayi kele na mpasi, samu na kubeluka ya yandi. Amen.

Mpangi-kento Nash, Nzambi me vulusa nge na cancer, mwa bamvula me luta.

289 Mfumu, pesa Mpangi-kento Nash lombilu ya yandi. Mutindu kisadi ya Nge, mu ke lomba yawu. Ya ke salama. Ya kele mvutu, Mpangi-kento Nash.

Na Nkumbu ya Yesu Klisto, pesa mpangi-kento ya beto lombilu ya yandi. Amen.

290 [Mpangi-bakala na mpangi-kento ke na kutuba na Mpangi-Branham—Mu.] Matondo na nge, mpangi-bakala, mpe vutuka na bantu ya nge yina vwandaka kuna. Bika Nzambi kupesa yawu. Ntangu ya kitoko mutindu yayi, bantu ya nge vukanaka ntangu mu vwandaka kuna. Nge vwandaka na Bombay ntangu beto

vwandaka kuna? Mbote, na yina nge ke kwikila bima yayi yina mu . . . nge me kuwa?

²⁹¹ Mfumu, mutindu yandi ke vutuka na bantu ya yandi na simu na nzadi, bika yandi kwenda ya kifuluka na Ngolo ya Nzambi, ya kubeluka na balombilu nionso yina yandi me lomba. Bika yandi kwenda mpe yandi kuzwa yawu, na Nkumbu ya Yesu Klisto. Amen.

²⁹² Na Nkumbu ya Yesu Klisto, Mwana ya Nzambi, bika mpangi ya beto ya kento kuzwa lombilu ya yandi.

²⁹³ Mfumu, pesa lombilu ya mpangi ya beto ya kento. Bika ti mpasi ya yandi kumana kaka na ntangu yayi, na nzila ya mvumbukulu kati na Yesu Klisto. Amen. Mpangi-kento, ya fwana salama, ya fwana salama kaka!

²⁹⁴ [Mpangi-kento ke tuba na Mpangi Branham—Mu.] Nge ke zola ti vutukila yayi na Nsangu ya mbote? [“Yinga.”]

²⁹⁵ Mfumu Nzambi, mutindu kento yayi ya ntwenia me telama awa, samu na mitifi ya yandi mosi ve. Yandi ke na kusambila samu na mpangi ya yandi ya bakala, ke na mikolobo na menga ya yandi. Mu ke pesa yandi lombilu ya yandi. Na nzila ya lutumu yina ba pesaka munu na Wanzio; mpe na nzila ya vision ya Yesu Klisto, mwa basabala fioti me luta, na kati ya kivinga; mu ke pesa mwana-kento yayi lombilu ya yandi. Amen.

²⁹⁶ Ya fwana salama. Nge ke zingaka pene-pene awa? [Mpangi-kento me tuba, “Memphis, Tennessee.”—Mu.] Memphis, Tennessee. Nge ke sonika namunu mukanda. Nge ke—nge ke—nge ke kuzwa lombilu ya nge.

²⁹⁷ Mpangi Grimsley. [Mpangi-bakala ke na kutuba na Mpangi Branham—Mu.] Nzambi sakumuna nge, Mpangi Gimsley.

²⁹⁸ Mfumu, beto lenda bambuka moyo wapi mutindu mpangi-bakala yayi me katuka ntama, mpe dibulu yina yandi me timuna. Yandi ke zola Mpeve ya Nge ya kulutila, Mfumu. Mu ke pesa yandi yayi, na Nkumbu ya Yesu Klisto. Na kumonaka mukongo ya yandi ke sala, ti yandi me meka na kulanda Nge, na yina, na nzila ya Ngolo ya lutumu yina me pesama na munu na nzila ya Yesu Klisto, yina me siamisama na Wanzio mpe na vision, mu ke pesa Mpangi Grimsley nsatu ya yandi. Fulusa yandi na lukwikilu, mpe yandi ke vwanda na kutambula ya pene-pene na yawu.

²⁹⁹ Yinki kana mu tuba na nge, kwenda mpe beluka, samu na zola ya Kimfumu ya Nzambi? Nge ke kwikila yina mu me tuba samu na bampadi yina mpe yankaka, mpe nge ke kwikila ti ya kele ya kieleka? Na yina, Yandi, Yandi ke pesa munu yina mu ke tuba na “mongo yayi.” . . . ? . . . Beno ke vwanda na yankaka ve. Beno ke kuzwa yankaka ve. Ya ke vwanda diaka ve na maladi, beno zole ke vwanda, mbote.

300 Mu ke pesa lombilu yayi yandi me lomba, na yandi, na Nkumbu ya Yesu Klisto. Amen.

301 Tata Nzambi, pesa yayi, mpangi ya beto ya kento, lombilu ya yandi, na Nkumbu ya Yesu Klisto. Amen.

Ok, mpangi-kento, kwenda, kwikila yawu.

302 Tata, mutindu kento yayi ke luta awa, mu ke sambila ti Nge ke pesa yandi lombilu ya yandi, na Nkumbu ya Yesu Klisto. Amen.

303 Na Nkumbu ya Yesu Klisto, mu ke pesa kento yayi lombilu ya yandi. Amen. Kutula ntembe na yawu ve.

304 [Mpangi-kento mosi ke tuba na Mpangi Branham—Mu.] Beno ke kwikila ti beno ke kuzwa yawu? [“Yinga.”] Na yina mu ke pesa nge lombilu ya nge, na nzila ya Ngolo yina me pesama na munu na nzila ya lutumu ya Yesu Klisto, mpe ba pesaka kimbangi . . . ? . . . Kwenda, mpe—mpe Nzambi ke vwanda na nge.

305 Mpangi Fred, yinki kele na ntima ya nge? [Mpangi Sothmann ke tuba na Mpangi Branham—Mu.] Mpangi Freddie Sothmann, mu ke fundisa ndikila yina na kati ya nzutu ya nge. Bika yawu katuka na nge, na Nkumbu ya Yesu Klisto. Amen.

306 Mpangi Collins. [Mpangi Collins ke tuba na Mpangi Branham—Mu.]

307 Mfumu, mpangi-bakala yayi ya ntalu ke sosa mbotika ya Mpeve-Santu. Mfumu, na yina nionso kele na kati ya munu, mu ke tuba Lusakumunu yayi na zulu ya Mpangi ya munu Collins. Pesa yawu. Bika Mpeve-Santu kukwisa na zulu ya yandi, mpe bika yandi vwanda ya kifuluka na Mpeve-Santu! Amen.

308 Mpangi Collins, nge fwana kuzwa Yawu, Yawu fwana kukwisa. Nzambi kaka ke na kumeka beto.

309 Mfumu, pesa lombilu yayi. Bika yandi sadila Nge, mpe dibuta ya yandi kusadila Nge, na bantima ya bawu nionso.

310 Nzambi, pesa na mpangi ya beto ya kento lombilu ya yandi. Samu na nionso yina yandi me lomba, bika yandi kuzwa yawu, na Yesu Klisto Mfumu ya beto. Amen.

311 Mfumu, pesa na mpangi-bakala yayi ngolo ya kusadisa dibuundu ya yandi. Bika yayi kupesama. Mu ke pesa yandi ngolo yayi, na Yesu Klisto. Amen.

312 [Mpangi-kento mosi ke solula na Mpangi Branham—Mu.] Mpangi-kento, ya ke kima mosi ya yimbi mingi yina ke na yawu, kidi-kidi. Nge ke kwikila yina mu ke tuba na nge kele kieleka? [“Yinga, mu ke kwikila.”] Nge ke kwikila yawu ntangu yayi, ti mu—mu me tuba na nge kieleka? [“Yinga.”] Na yina mu ke pesa nge kubeluka ya nzutu ya nge, na Nkumbu ya Yesu Klisto. Kaka ya kieleka mutindu mu me telama na chaire, kidi-kidi ya nge me bika nge.

³¹³ [Mpangi-bakala mosi ke tuba na Mpangi Branham—Mu.]
...?. . . Ya me telama kuna, na zulu ya beno nionso.

³¹⁴ Mfumu Nzambi, na mpangi ya munu ya bakala ya ntalu awa, mudindu mpe midindu ya mpeve ya yandi ke bokila mutindu mudindu ke bokila Mudindu. Yandi ke zola Mpeve-Santu. Yandi me zitisa kisalu ya Nge, Mfumu, na mutindu nionso yina yandi lendaka. Na nzila ya Ngolo ya Mpeve-Santu, bika Yawu kwisa na zulu ya mpangi ya munu ya bakala, mpe yandi kifuluka na Ngolo ya Nzambi mpe lemvo, Mpeve-Santu. Yamba yandi, mutindu mu ke pesa yandi na . . .



KWENDA, TUBA KNG60-0417M
(Go, Tell)

BANDANDANI YA NSANGU YA PAKI

Nsangu yayi ya Mpangi William Marrion Branham, kulongamaka na Kingelesi, na suka ya Lumingu ya Paki, na kilumbu ya 17 ya Ngonda ya yiya, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org